



讀史亭詩集卷九

南陽彭而述禹峰甫

七言古詩四

梧州老榕行

有引 以下續真點集

樹在梧州公寺騎墻而生不知幾千萬年大數
畝童童幾車蓋嶺南多大樹盡榕榕之此為霸
癸卯六月有黔臬之行拏舟來梧憇此為作老
榕行時趙人劉經菴文士官此一見如舊識率
書此篇相質願經菴好藏之與此樹俱壽可

倚天拔地從中起蛟龍怒吼三江水本是明堂

廟材

如何偃蹇荒服裏枝葉扶蘇捲復開九真雲

勢接羅浮參斗動蒼梧綠瀋浸朱崖風平日
千間碧玉澄一色獨秀山高讓一頭銅柱爭雄
有時搖曳震風湍上潦下霧湧百蠻萬馬辟易鐵
根如盤石怒猙獰三伏赤日暍欲死婆娑其下涼無比
層冰峩峩陰山雪藐姑綽約來僊子我欲移向邯鄲道
囑付木客勿相譙喧逐車馬蔭萬人卽不棟梁勝嶺嶠
借問父老植何年依稀聞得秦漢前陸梁開道俱白骨
更無楊僕下樓船桃源歲月迷晉魏五大夫應難肩背
只疑造物相胚胎孤峙南天成一隊

謝將軍

將軍裊屐起燕臺三百斤弓雙手開更染柔翰擅當場

方略十二走羣才推轂跨馬粵王國元菟樂浪戰雲黑
獨杖馬策叩壁門十萬金甲安反側天子垂念顧桂
林七星岼上黃麻新租稅一時通交趾鼻飲川浴皆來
賓鳴鞭近過蒼梧郡樓船東下三江震客來命酒還圍
碁十丈榕蔭嫺八陣將軍有母年七十北望長安韎鞞
濕幾番欲歸不得歸欲把斑斕易戎褶我來下榻君之
宅佛桑花下酌琥珀是時正值三伏中一夜江聲喧霹
靂眼看水精百丈高匡廬瀑起廣陵濤將軍怒欲拔劍
起匣裏蓮花吹落毛昨夜東鄰響浙瀝人言有物戕
壁前旌到此魑魅休不當將軍之一擊誰解將將而
儒左列橐鞬右圖書羊祜軍中常緩帶弟孫樽

壺君不見古來良將出趙邊秦歟漢歟戰鬪還
下精兵處盧龍碣石非徒然我與將軍狂呼盡
梧夜半星月白來朝分手入黔州茫茫雲山萬里
石蒼

都狼行

有引

余官桂林兵巡康熙元年八月永福牒云有賊
殺人理定江幕府于公檄官兵捕之命予視師
永寧守史贊勳功最著爲作都狼行

康熙元年時仲秋暴客劫人理定頭大鎗鐵脛十七人
白日血渾江水流殺者何人名蔡葛如此賓州太守何
白鏹紅顏捲地去大礮飛鏃傷人多邑宰軍書來見告
尚書聞之傷懷抱會城貔虎擁如林黃金肘印大將軍

不宜國門咫尺地倉猝還有南塘事花闌紙票出兵符
喑嘆何人未獻俘兵巡使者膺專城急呼校尉來點兵
叅軍驅馬都狼去夜半御枚嶺上行我兵伊何陳與王
馬家裨將居中央是時秋陰天又雨賊巢尚有百餘里
爰分間道出奇師人縛馬舌捲旌旗帶雨黎明入虎穴
鼓角無聲短兵接朱殷漲膩始龍紅頭顱模糊草木風
用將京觀築鯨鯢解甲直與都狼齊就中死黨八百餘
反接自首哀言詞我聞脇從應罔治擒賊無如殲其渠
向者截舟十七人累累長跼堦下陳飛騎走上軍門書
獬豸餘孽一時除出師振旅剛百日裸國徭丁
日者師從枕上過從此南人安反側轉輸芻糗
歎息

危灘毒溪深千尺赤脚花衫佩短刀作尹廳狄
借問使君彼何人河內男子史贊勳

憶昔行

憶昔烈宗戊寅歲盜賊如麻人鼎沸中原白骨高如陵
推轂將軍等兒戲是時渠魁誰最雄西營八隊張獻忠
摧隋名城無其數甘言搖尾房州東總理何人熊尚書
八閩曾安海國逋爲申前議專招撫寶馬黃金錦繡襦
尚書帳下多材官如十九人來邯鄲漢家不少中行說
晉陽誰復張孟談我時孝廉方家居尚書聞我親式廬
更有王孫爲交薦東帛芟芟責門閭我母驚聞止兒行
兒未服官何輕生親朋闌道爲遮畱此行毋乃非身謀

我謂母曰不足懾此但恃兒口中舌曾聞韓愈使河北
豈必魯公遇希烈吹角鳴鞭南門路鐵脛銅馬不足慮
百里鄧陰蕭相祠五龍門前漢江渡賊整軍容夾道迎
皂旗高牙下江兵匹馬入營三軍起紅帔腰鞬主人禮
我稱王命作上客折衝樽俎無草澤羊酪牛炙幾夕晨
胸中鱗甲不可測歸見尚書恭致詞出其不意兵薄之
尚書謂我迂而癡此事何須更用師大堤正駐左寧南
銅鞮日夜醉管絃更輦黃金三十萬元戎斗印到軍前
未幾賊果飽颺去從此難將折東至漢江千里流血渾
拉剽洪支不知數尚書身向東市死賊渠躍馬江
孤兒寡婦化青燐征南破蜀未見此成都財賦天下

秦漢倚此起關中蠶叢路絕杜鵑死兩江水湧劍閣
曾聞養賊如養虎穀城之事目親睹坐使中原滅勢逼
龍髯一去無消息相公司馬何人斯銅駝荆棘九月移

廣陵行

大梁閣部領揚州上下長江建列侯鎧仗霜寒三十萬
漕糧雪燦五千艘靖南幕府畱瓜步左家壁壘漢陽渡
更有二劉堪犄角間道出奇亦不弱此時江東捲土出
更邀北軍左右翼君臣飲血蕩秦師唾手關陝不可知
何事南朝俱如寐半壁山河猶貨貝眼看廝養豎旌旄
乍見王侯開邸第曾聞貫索滯前星節鎮治兵江夏城
爰撤黃公辦西事淮揚一時失障蔽是時大軍已渡河

廣昌先倒馬前戈聞道東平更蹈海止有揚州孤注在
丞相身披金鎖甲雙劍怒吼圍三匝部下壯士盡刀頭
傾城粉黛一時休金陵自此不用戰鐵鷁飛入明光殿

潼關行

文燦已誅嗣昌死闖賊目中無全壘偃師一戰左軍逃
百二關中在囊底代州司馬起南冠汾陽部曲角聲殘
散金椎牛勤召募橫戈直欲輸心肝司馬自顧兵力弱
上書廟議請咨度稍寬時日更籌兵佇看綠林一鼓平
臺省諸公慣舌戰皇帝聰明亦受炫爭言司馬費金錢
坐失事機良非算司馬類禡便誓師十萬鐵甲如掣電
二陵風雨古來多夜半量沙可奈何元戎督戰氣愈厲

怒馬飈馳看裂皆鐵脛大鎗幾重圍一時前軍倍精銳
司馬桓桓九尺軀丈八神矛手親提更彎雕弓左右射
僵屍直與商山齊天險已隋潼關摧表裏山河赤爲此
司馬竟濺沙場血紅顏黃口歸井渫妻妾子女十七人
霜魄香魂葬一穴是時天子重建侯東壓河濟西楚州
擁兵各有數十萬滿堂羅綺醉筵篔簹賊衆控弦入晉薊
上谷漁陽無戰備節鎮戟門午未開遂有甲申三月事

大梁大水行

黃河水沒梁王宮戶口十萬化沙蟲饒口魚龍飽欲死
天風捲屍大海東百丈浮屠餘三尺金宮銀闕入鮫室
艮嶽平臺復何有白波勢與嵩山敵餘艘大艦何處來

王孫禁女出東街圍城盜賊不須戰壁壘無人只自開
御史中丞乘小牒汎波中流纔一葉十日不食亦不飲
剛遇登封大舟楫教坊朱邸舊名倡回角吹簫各擅場
自縛木罌凌瓠子九死不忍棄周王我時繫馬晉陽城
因感晉陽灌城事乃知水之爲利害讀書須讀河渠志
此番馬首入東京黃狐赤狸塞滿城果見金僊剛露頂
向來人在地中行幾家沽屠土銚門藍縷衣裳半裹身
信陵公子能愛客可憐更無守冢人

王將軍談南陽舊事

康熙二年梧州城偶與將軍相對酒將軍不知何方人
項帶刀疤一寸厚彷彿年纔四十餘腰間鞞帶雙銜珠

豪豬韉子紅纓帽口操秦聲不枝梧隨問刀痕緣何事
將軍彷彿還能記略憶崇禎十四年流寇掠取河南地
南陽朱邸唐王孫高帝子孫肺腑親詔書屢下頻南顧
未許鐵騎過朱門兩家總戎猛與虎猛如虎
虎大威廷受兵符到
藩府相從一半榆林軍三河俠少相參伍獨山牧馬纔
崇朝諜報賊鋒過穎橋裕州葉縣無堅壁左帥朱僊久
遁逃王孫夜與將軍約或戰或守定一著城內粟可支
一年間左蕭條無處掠賊鋒甚銳且勿交伺間乘暇礪
寶刀但使將軍全社稷何須更覓霍嫖姚語尚未終突
騎至三匝幾同華不注西洋大砲如雷霆衝車雲梯更
不計屋瓦皆飛虎豹鳴昆陽之後無此聲恍惚更憶河

北戰壁上諸侯鉅鹿城四門屯錮鏖攻打霹靂列缺三
晝夜內外喧阗鼎沸中爲賊爲兵兩不下偏將何人是
左襄自知賊鋒不可當奪門躍馬五百人亡命蹀血脫
戰場是時人心已渙散肘腋之間遂生變如彼牽繩有
絕處西北城角開一面將軍接戰短巷中渾身是膽鐵
圍紅一折牙旗成粉壘慷慨不暇更從容王孫侍女皆
星散玉甃梧桐滿後院無處更尋青珊瑚隆準大耳齒
一劍南陽城內血成渠南陽萬戶化髑髏維時賤子作
偏裨酣戰連宵力已疲不記當場殺幾人依稀彎弧隔
馬時白刃砰訇人命賤左膊右肩俱帶箭生死魂迷皆
不知咽喉氣息纔如線腦後傷不記姓名屠刀亂下如

犧牲一身換作磨刀石幾番求死更不能體無完膚何
况此解衣視之良爾爾果然四肢如刻畫每逢陰雨痛
不止言罷泣涕更沾襟談及往事多傷神故國山河今
已去爾我徒為殘廢人

房山寇行

獻忠死蜀山自成殲湓浦 大清建皇極盜賊無處所
何有遺孽尚偷生竊據房竹謝羅坪時佩刀劍還耕作
鳴鏑突馳任縱橫窟宅延袤褒斜谷夔子巫山相連屬
擅居王土非王人二十年來恣蠱毒有時狙伺天柱峰
紫霄宮裏瓦飛紅子女金錢歸鈔略千山香火斷齋公
有時躍馬漢江下輒與官兵相攻打向者曾傾五千師

中丞捷書令人罵鷹眼時復窺漢中連雲棧與子午通
便欲耕屯渭左右一丸泥塞潼關東朝廷何難動一旅
笑謂鼠子不足取仍宣赦諭下荊州既不封侯待不死
三家節度屢上書此人非可折柬呼因之 天子赫然
怒三路將軍各出師山礪崎嶇轉輸難里胥選戶出丁
男每夫運米約四斗脚踏左擔千萬盤蒼黎出夫各歡
歎天子為我除禍患婦贈芒屨兒負釜日望鯨鯢築京
觀今年二月出西征今年四月賊已平前日邸報飛兩
捷為秦為楚大中丞唯有蜀督未見報想應賊未入蜀
道招安反側十萬餘蔡人吾人皇帝詔上請朝廷設官
吏葦路藍縷待布置 皇帝夜展輿圖看不喜殺賊喜

得地我居宛南賊近郊順陽鼓角一江遙嶺外此時讀
露布恨不即日挽歸橈計日賊除應罷兵家園不駐將
軍營周餘殘喘得安息年年布穀催春耕

昭平灘二首

試問灘聲抑何疾有如萬馬相爭趨篙工面面無人色
死生便欲決斯須弩力勢與馮夸戰龍母蛟孫如飛電
鰐齒如霜丈二長日吞駟儂從難饜東鹽滿載撫軍舟
砰訇豁豁過石頭分付江神且莫侮不是尋常舊商估
秦人開嶺良苦心郡縣而今說桂林桂林一水下蒼梧
日夜聲喧萬轆轤盈盈千里三百灘下者連瓠上天難
約計一灘高數尺地形便與星壤隔粵東百貨聯舫來

胡椒檳榔次第開鹽筴金錢十萬緡行齶使者克軍餉
不然廣西嶢峒國不食東鹽人亦得

別鶴瞿歌

十年画舫寄邗溝廣陌金粉照朱樓我友鶴瞿方抱膝
已是江左夸吾儔白髮蕭疎入百粵自憐饒具虞翻骨
謁來鶴瞿亦踰嶺手捧簡書下北闕猺窟駱戶苦難馴
桂蠹椰漿魁髻人今日詩書傳陸賈漢風丕變滿朱垠
一番邂逅等膠漆如飲醇醪真莫匹那知分手傾蓋間
眼中伏波已相失桂林遙望五溪山蛇途牛角八千盤
自笑蹉跎兩度過部雜生苗與烏蠻一身遠托夜郎國
鐵鎖飛流隔爨楚同作外臣我更遠對此曷能不歎息

君盛年我落魄梧桐葉老雁初飛人生難得及時樂
江美酒置千壺且畱斯須與君酌

楓木嶺迤西山路險巖今開除如砥且數百里
一番卯三過此記事

楓木嶺勢割雲霄開闢以來未見此十步喘汗五步歇
鷓鴣塌翼互猴死偏側捨卻變幻奇陟崖絕澗命如絲
懸度微茫不可辨如過大痛小痛時近日周開府山川
受經理飛檄下郡縣鏟削如平砥朝發武岡暮抵黔陽
我僕木杪俯雀巢我馬蹠躩渡板橋鑿山開道者誰子
我今爲作周公謠

貴州送馬君輝歸浙東

我昔浪遊昆明池逢君征南幕府第是時上將方出師
鐵鎖金沙沸鼓吹公手征南一卷書周迴萬里掃葉榆
褒斜健爲指顧間左攜唐蒙右相如大渡河邊玉斧開
六詔象馬滾滾來我思瀚海昔勒長舅銘千年短碣照
班生又如丞宰與師淮蔡日韓愈文章懸瓠城我爲讀
罷長咨嗟爲君呼白走龍蛇此事他年入國史征南實
錄良非夸磨墨楯鼻事未已如何更渡牂牁水邂逅逢
君在黔陽老驥雄心未可量問君匹馬何所至君曰將
歸樵李過錢塘君歸莫向東山去此是謝安舊隱處

貴州送王右君叅政嶺東

憶昔繫馬長江日與君共趨丞相府丞相已成帶礪勳

經營手闢西南土幹略維君左右之不獨下馬草檄時
我每潭州陪清讌婆娑華燈振雄姿無那一官去衡嶽
此日揮手別東閣已知談笑失中丞豈真當路成枘鑿
此後昆明作遠遊君亦黔巫校牙籌三年之中兩晤汝
我來君去五嶺頭貴陽共作異鄉客君壯我老頭半白
看君匹馬走炎荒茫茫羅浮大庾隔甌駱風氣古來偏
百濟新羅日本船伏波兩度專征日九郡全歸正朔年
名藩授鉞開朱邸澤國艤衝患未已君昔參佐在三湘
開拓滇黔已如此遮君馬飲君卮送君那得不作詩
番禺山高割據歇看君竹帛紀南陲

送衛猶箴齋捧便道還河東

太原勾注連砂磧刺天湧出太行石崑崙蜿蜒倒星河
龍門砥柱纔咫尺天地光芒藏不得帝都王會河東國
六經以後無文藻崛起司馬傳筆墨卓犖衛君生其鄉
胸羅百代相低昂乍闢新巖開鬼國遍徵公車獻長楊
少年天子勤訪落正月王春玉帛錯况值慈恩祝釐
辰萬里孤臣傾葵藿朝天纔罷入壺關崎嶇九折壽陽
山迤邐持節經行地雨雪征塵驄馬還伊我昔年曾過
此往事飛揚等逝水今日牂牁一送君無端更欲拔劍
起君家舊有桑落酒我昔一飲三百斗倉猝南來二十
年夢想此物不到口何時舊地復重遊與君爛漫倒觥
籌醉後攜手共踏藐姑之上頭蒼茫九塞望中收俯視

黃河一線流不知此願可能酬

丙申重經江夏憶羅節度

追錄

憶昔江漢草昧日武昌城外盡飛鏃洞庭一水即戰場
烏鳶白日啄人肉八郡子弟多憔悴屈宋衣冠非舊族
我時局促守一經杞梓梗楠在深谷關東節度豫州來
手披翼軫衡岳開十部從事書一紙樽俎談笑驅風雷
明光一疏萬言瀉吹噓上天呼使者自此雄風振楚國
豈惟白雪出郢下未幾攬轡復南遊芙蓉七十望中收
名王傾蓋成薦達中丞鹵簿水西頭鎧仗剛發寶慶城
三匝忽聞戰馬聲夜半陷圍親搦戰義從裹血出軍營
得公羽書飛夢澤雄師十萬壯魂魄長沙岳陽鼓角昏

廓清一旦歸疆域中山滿篋彼何人當道曾逢御史嗔
初服一棹歸樊鄧杯酒黃鵠慰我頻往事及今已十載
知己無存城郭在孤舟此日問瀟湘灑涕當年舊壁壘

水西行

有引

水西居黔省之西北境大荒國也羅甸王火濟
居之漢以來不通王化 本朝自十五年開黔
閱康熙三年 朝廷遣兵討之大將軍以下二
十將軍拓其地前後凡三戰斬馘有差渠魁安
坤尚逋誅予由滇藩之軍中駐六廣陰雨連朝
爲作水西行

我皇神武誓長征天策羽林上將營特遣元戎授廟略

鐵騎十萬水西城淵淵闐闐擊画鼓叱咤之間風雲覩
雕弓在箠箭在腰二十將軍彪虎怒苗壘何堪作戰場
蚤洞蠻窟不可量混沌以前未見此密林深箐何茫茫
鑿山剜道填鼓吹馬上兜鍪裹糗糒大者牛車小負擔
日爲君王開土地延袤四府多膏田烏蒙鎮雄與東川
此輩婚媾相犄角古來結聚西南偏昨者露布三大捷
或化鯨鯢或反接死黨散盡憑陵孤游魂豈足膏斧鉞
甌脫自此供職方縱橫千里多稻糧 天子萬壽輕而
康空同長劍掃粃糠

羅甸古外域竄居滇黔腹滇黔旣入郡縣中水西猶然
稱荒服向者事起天啓年水西乃與播州連一傾我軍

三十萬椎埋黔省無墓田疆場至今烽火青照見國殤
列舊營此物百年不復收瓦礫殘缺水西城甲申以來
關東戰靖埽燕都定喪亂幾度樓船過昆明又復提師
過緬甸飲馬欲斷牂牁水三苗負固無全壘鼓吹纔渡
六廣河大軍直搗果勇底崖岢懸絙三百丈牽藤人如
獼猴上下有深淵上青天人在山陰之腑臟轟雷飛礮
列缺紅長崖人下絕壁中革箱裹鐵擊撞處天驚石破
百羅空蠢茲歛然喪魂魄宗生族長甘就縛不信其中
大有人生聚依然見城郭前此一萬八千年中國王會
不能宣開山鑿石逢今日普天長貢水西篇

送陳碩龍觀楚中

頑龍先生起淮甸自幼學書兼學劍左攜陰符右昆吾
獨步江淮人所羨曩者事在鼎湖中手障東南當一面
指揮江上王敦死再定溧陽蘇峻亂駱駒已報過揚州
八公山下人不戰爾時飛檄四鎮兵保障山東七十城
回首江南失故國鐵騎十萬大軍營將軍倚閭淚沾裳
遙念白頭指故鄉况是義師關左戰手擒獬豸報先皇
將軍淚下如鉛水國運天心正如此高郵相公棄印歸
東平跋扈肉袒裏將軍登壇復下帷手攜佳兒換錦衣
昔也彎弧今射策驂駟同向五雲飛有子今作虹縣郎
有父昔刺湍水許兩邊棠樹分南北一漾謳歌思召杜
秉鞭作牧復太行貴竹蒼梧兩相望送君今過洞庭水

白首交情倍感傷公昔下車我落魄啞啞言笑春風閣
豈期一去適長沙便與青山負然諾揮手送子武昌城
我復萬里去昆明山河綿沓分方域骨肉關情別弟兄
我有雄心未建旄時命難將理數遭將子今爲金吾客
節鉞何堪笑二毛只今大國屬江楚西山寇盜無終已
古人治獄兼治兵汛埽房竹無全壘君家舊略在戎行
往事披靡幾戰場開承大業多垂暮老驥伏櫪淚幾行
悲歌發離恨長黔州有酒滿千觴願君努力莫相忘

別張公詩

督糧使者洛陽來手持牙籌心計開向者身居大農日
國計民生總自裁此日西南用兵久倉庾錢緡無一有

昨者下令流水源轉粟真同量沙手羨君妙譽能兼通
酒政文心笑語中六博投壺兼飛檄命履東山何從容
交君真可譬醇醪歲寒良不負久要况我與爾同鄉縣
兩鬢蒼蒼已二毛我爲觀察子繼之我復萬里入滇池
把君手飲君卮萬山落木遊子悲陳君之外無知己與
君且復醉斯須

別董公

董公健者氣絕倫夙昔曾作上將軍甲申南渡秣陵春
手障鐵圍淮海濱指揮十萬何嶙峋唾手虞淵取日勳
北來大隊滿天津鍾山陵樹化作薪六宮粉黛石榴裙
短袖悲啼馬上聞董公飲血渡江濱武昌安慶獵火焚

揮戈魯陽不敢嗔東南半壁已沉淪董公杖策來稱臣
躍馬川蜀過西秦褒斜子午摧車輪保寧畜牧南鄭屯
又曾驅車到八閩大梁平臺醉日曛孝王之苑酒千巡
回首太華黑水滑碧雞金馬炫若神 皇帝念此滇黔
民汝往乳之飲其醇金吾羽林聚如雲金錢百萬聚散
頻赤手仍不見一文方伯無如董公貧予也歷落嶽嶽
人頗有肝膈取君真與君意氣獨相親此日別離不忍
論白頭灑淚欲沾巾

甲辰重九復遊鸚鵡菴

向者登臨值此地勝友如雲八九人今日尋秋復到此
載罹寒暑更五春追憶舊遊復星散或生或死各異縣

眼前古檜黃葉稠把臂談心何由見自歎人生會面難
朱門駝馬散如煙當時連床風雨夜此日忽隔九疑山
後會無期魂斷絕丹青信誓限吳越不堪回憶舊時遊
山頭同看中秋月

送楊職方入長安

憶昔授經南郡日一時網羅傾江漢是時楊子甫成童
隻手攜得青玉案上有珊瑚尋丈長下有星辰互燦爛
我爲把玩長咨嗟洞庭雲夢相倚斜忽而化作南岳雲
七十二峰連海霞予去初服嵩山陌茫茫煙雨鄂渚隔
十年不寄一書札萬里遊人頭半白今日逢君滇海邊
五華山色六詔前壯心寂寞雲臺仗屈指別來十七年

君年未壯吾已老邁近送子邯鄲道國之大事莫如兵
司馬得之名譽早只今東海西山事已平唯有水西尚
列大軍營破巢犁穴親搦戰烏蒙東川皆革面將子驅
車入金門汛埽螳子如飛電君不見馬鈞陽劉華容廟
謨邊略二君何縱橫唯子勝算能壓荒服四郡城萬古
西南不用兵

馮再來節母戴太君詩

越山有女閑書冊天台鴈宕大江隔自從結褵賦蘋蘩
不同凡女共巾幗藁砧慟絕秋霜清子規夜啼山竹裂
阿母辛勤画荻灰爰鍾令子上苑客頓將黍谷變陽春
自是天心眷有德萬里金馬碧雞祠手執刑書馳蠻貊

高步詩集卷九
不堪回憶黃鵠歌雪霜慘淡龍蛇阨淒淒風雨淚痕中
贏得金門首射策予時坎坷走炎荒逢君邂逅真超越
念君異骨本生成向來文字復奇絕為詳君履讀君書
令人白日生哽咽予母曾作未亾人紡輪猶帶指上血
只今濩落無所用身將老矣頭如雪羨子綵服且華年
赤城霞起在東浙我欲登堂往拜母如見并州舊白髮

送吉太丘之貴州學使歌

皇帝四年再來南中道路逢子去何匆匆使君南去九
百里漢節遙臨五溪水萬山詰曲一線通紅苗烏蠻間
壁壘自昔我聞羅施國夜郎牂牁相扼塞穴居蠶處非
我族盱眙侏儸天為黑前此勝國三百年開山千里近

蜀川歲貢公車賓上國六經名教得薪傳近來聲教朔
南暨我 王冲齡翊運出要令草昧起文明不教猱狃
入鬼魅况君立朝多風節壯心老驥難沒滅豫章殺賊
八十萬箭花滿眼刀磨血是時 天子動顏色璽書下
勞錦獸織何人解妬甘陳功欲畫麒麟不可得坐間絳
灌誰與倫自言兒輩上將軍偶因半醉罵權貴拳折卿
相不須嗔幾載沉鬱劍光澀夜半猶聞山魃泣昨日躍
馬過金沙羅羅燹豎毛立王師新蕩水西城南謝北
謝各罷兵繼此全歸羅殿部獠狸巢穴一時平我昔交
君在長沙日醉洪公宰相家東西分手各兩散今日相
送復天涯送君行難為別爾我仕宦各他鄉南雁北鴻

勿斷絕以公兼德今作師蛾子術之照蠻彝文翁常袞
彼何人向來文字啓西秦君不見黎平公楊監軍身當
國家板蕩日吐氣猶與山河壯深山大澤產偉人鬼國
何曾無將相

送胡都閫之江東歌

胡公與我交五年兩度相逢俱在滇一朝南去問樓船
故人撒手如雲烟問子何所之將過匡廬凌三山問子
何所攜長劍陸離吼龍泉少經大小百餘戰指揮壁壘
白羽扇左手跨得左賢王右手撥刺天山箭自從王師
定雲南牙旗畫捲畫角閑昨者一鼓水西平紫犛花苗
敢縱橫盧循孫恩已報滅海上鯨鯢尚餘孽尚書忽下

討賊符偏師江上埽逆逋采石磯濡須口此是長江南
北要害之淵藪莫愁湖上六朝松歷代繁華在眼中倩
子今飲建業水母使他盜窺江東

陳將軍歌

君不見北平將軍礪寶刀殺賊中原如刈蒿畧記當時
陳汝戰西精旣平渣呀高有子弱冠猛如虎束髮欲取
河南土當年李闖氣最雄一時眼底無關中大梁城角
正鏖戰賊之右目忽受箭江東不爲赤縣歸回首玉座
已摧陷將軍躍馬定三秦雄師十萬埽黃巾偏師又定
梁州亂手闢河湟下崑崙河堤當年捲瓠子萬戶千門
化作水圍城半載攻不下自非將軍不至此提師還復

入六詔翻然爲闢昆彌道西南天地待君開車里緬甸
一時造爲君酌酒爲君歌子方年少我婆婆依稀記得
四十秋我與太公同醉古穰州太公據鞍顧盼氣雄豪
子亦彎弓上馬身如猱兩世交情何繾綣白髮鬢鬢淚
如霰

張晦先柱史歌

當代柱史何人斯我聞身起常山郡臨軒天子賜酒頻
番禺朱崖君是問是時東南亂初定羅浮山射海光動
新羅百濟皆來朝珊瑚翡翠齊入貢西里浪泊無盜賊
鯨鯢息浪星月白尉佗自用天朝禮呂嘉更鋤邯鄲色
是時蜀道尚縱橫白骨如麻積錦城君爲一開褒邪路

劍閣如砥雪山平更念西南煩司馬詞客猶勤萬里駕
指揮乃見冉駝通閉關能使吐蕃下惟我老髦與君遊
知君詞命居上頭衰音啞彼竟陵儔草蟲蟋蟀聲啾啾
我時抗浪渺難匹跋扈飛揚無與比此日甘心死太原
敢向中原問牛耳今之著作誰鉅公孟津已葬北邙風
得我與君相犄角不令瓦缶搖黃鐘君方年壯我已老
邂逅逢君蘭滄道縞紵雖然是新投海內應求子舊好
幾日同看太華雲幾回共踏昆明月人馬辟易失枝梧
不覺牙旗竟爲折我方跨馬入燕趙萬里行被金門詔
秋風颯颯下梧桐故人把酒傷懷抱我去君來經歲暮
雪花滿眼盧龍樹有時燕市還對酒相逢更折高梁柳

附 送彭禹峰先生應詔赴都門歌

真定 張純熙 晦先

銀河耿耿秋月白我友策馬長安陌
天子側席憶長卿獻賦長揚聲名赫天涯此日惜離觴同人攜手
上河梁矧余燕趙悲歌客把酒臨岐倍慨慷文章有神交有道世人紛逐何草草先生力起八代衰障砥
柱瀾於旣倒少小本具封侯骨健翮排雲似秋鶻彈
琴曾坐單父堂一劍能當十萬卒是時潼關已不戰
賊兵直入昭陽殿陳陶青坂事可悲荆棘銅駝勢忽
變徒跣哭廟血淚乾身著麻衣歸鄉縣傳聞弘光已
南下國事蝸蟻胡爲者官爵塞滿石頭城南渡威權

歸左馬先生披髮入山深却聘書答史道鄰楚囚對
泣嗟何益閉戶聊爲梁父吟 清朝乘運秉太阿

世祖奮起揮 天戈先生龍臥起南陽報韓不作五噫

歌 朝廷開國重選舉秉憲衡文過三楚酒酣賦詩
黃鶴樓王祭禰衡等爾汝氣吞五岳猶未平直欲乘
槎問牛女仰天大笑惟李白下視羣子如腐鼠片語
傾動洪丞相握手風雲孔武壯隨藩開撫關黔陽甌
脫大夏列亭障旌旄直到海西頭豈徒爨蕪獲菹醬
建牙吹角西南行妖星夜照靖州城前鋒摧陷狼烟
滅潢池何人更弄兵先生臨敵意整暇羽扇綸巾真
不亞手提寶劍七星文須臂挽弓左右射麾下健兒

氣如虎丈八蛇矛銅牙弩斬盡鯨鯢走橈槍積屍流血武岡土嗚呼此事二十年父老銘勲勒燕然功大謗生反受過揮手長笑遂歸田男子蓬矢射四方宦遊何恤走邊疆伏波山下著述多斷獄明刑復牂牁兩涉滇海泛昆明太華峰高對嵯峨人生建樹何須早鬚眉如戟君不老匹馬秋風黃金臺傾倒燕山意氣好漢文下詔方求言羨君應詔登金門董賈天人治安策移榻前席動至尊嘉謨滾滾告我 后臨軒讚嘆不絕口御盞調羹親賜酒石渠蘭臺重君集經國文章垂不朽君曰俞臣曰否元首康哉臣拜手此日遭逢真不偶萬里之行自茲始鷓鴣亭子河橋柳

古道離情歌一曲君今何辭醉百斗况有文章垂不朽

將遊燕與鄉人趙鴻章飲別因訊汴事

子居汴水我南陽居然與子成鄉縣鬢髮白髮六十年間關萬里乃識面晤子昆明傾蓋中無數荷花隔岸紅美酒十千來醉我無端却憶大梁東依稀猶記前朝事賊壓四境門晝閉青犢銅馬如堵墻嵩山震動黃河沸何來蟻穴潰金堤浪湧如山熊耳齊良嶽浮圖無是處賊方大戰虎牢西白谷旣敗潼關屺橫行燕薊真無敵義軍數萬填東海不遣子遺染鋒鏑此事去今已廿年眼看白波化桑田朝廷仍有河南地禹蹟茫茫走潁川

世間往復亦常理治亂相循十二子今日相逢在天涯
對此能無憶州里為問亂源事若何王侯第宅汴梁多
一自腹心遭傾陷盧龍古塞失嵯峨堤柳飛花似夙昔
繡壤山河竟崩坼不堪馬首望東京泥沙何處尋遺迹
洪丞相以經略治兵長沙予時以白衣從軍與今
臬司孔公共事稱莫逆會有飛語中兒子孔公治
之得止恙閱數年矣官滇黔如一日也會有燕行
賦此情見乎辭

經畧治兵長沙日西南猶未歸郡縣沿江羅列羽林軍
洞庭上下人情變是時紫陽界鴻溝列戟如麻簷栗稠
夜來詞伺防叵測衷甲蓐食古戍頭岑牟一人女墻中

夜半醉墮藥局東夢中云是夜即使為人穿鼻雙頰紅
一時軍壘乘風起如得敵國汨羅水得君鞫治衆無譁
投彼亂人付豺虎此意感君十餘年馬首車塵黔復滇
歷亂間關幾萬里我今被詔復遊燕黯然南浦與君別
君方華髮我頭白可知燕臺醉酒時等閒還憶長沙客

讀史亭詩集卷九 終

讀史亭詩集卷十

南陽彭而述禹峰甫

五言律詩上

平陽亢園

名園足勝事况復枕城隈
疎樹蒼烟斷遙山暮雨來
池面隨欄曲客身煩鳥猜
欽空穿石壁綺閣綴高臺
取境寂喧外何妨近市廛
木牌花姓字墨繡壁山川
霜氣空堦肅藤條古徑牽
到來餘一恨無竹著松邊

靈石道

甫息征塵路空林獨鳥聞
前山知是霍有水不離汾
到處武安廟荒坵國士墳
終南黛色裏烽火黯斜曛

拜辭母墓平陽將卜居鄴下

嚴飈吹霍岳灑淚別孤墳黃土長年草暮山何處雲旅
魂關塞濶歸路死生分總廢蓼莪句淡慚烏鳥群
新阡傷異域只此愧兒孫豺虎迷鄉夢蓬蒿長墓門殘
鐘來廢寺冷月破孤村秣馬西陵道傷心不忍論

同張雲齋避亂南徙自共城紆道二百里尋覺斯

先生舟於黎陽聯檝而進裁詩見投依韻奉答時

申二
月

舟檝同今日干戈彌十年鄉人俱異縣旅况復淒然缺
月江城暮青條野寺烟古來說廟算何以慰安全
久絕家園信所親何但疎那知衛水上得傍一舟居短

劔觸沙冷危檣動夜虛東南堪避地鷗鷺待平墟

揮手黎城去孤舟泛曲汀沙看浴鷺白雨送遠山青好

對雕胡飯同翻貝葉經黃蒿紫帝里知舊感晨星

已是聞聲至相憐况異鄉時方悲處燕誰復志封狼雙

槩中流濶孤燈夜語長弘農未可問不獨是南陽

沙鳥私相訝高旌照古原山川叢鬼厲樵牧侮官尊失

據黃河水難憑露布言試看淇衛草血帶馬蹄痕

同此北風意相將一水湄春來或舊雁花發是何籬坐

感物情變寧非人事為淮揚一片月瀟灑照青螭

蘇州徐元歎

拓落以今老儒冠戀髻絲到門紅莧發愛客老蘭知定

有名山在寧關我輩私晚風留石岫習習過軒帷

虎丘

好山今日到夏雨正淒淒僻徑石光澹蒼林虎跡迷轉
憐吳苑草舊接越來溪香散紅羅裏斜風煙嶼西

湖心寺步覺斯先生韻

甲申

知有湖心寺春烟一棹過柳風吹白鷺沙嶼隔黃河客
夢旌旗遠僧房薜荔多蘆溝橋上月慘淡意如何
不見北來信空餘南下情水涯忽有寺春杪未聞鶯客
况憐荒驛江風識舊京堪巖棲息穩只此愧塵纓

寄謝世培中丞

炎舟威季夏綠縹鬱若谿晚見孤雲去涼披一水西浮

圖歸野鴿荒廟奮山鷄却憶維揚道江聲雜鼓鼙

去年六月裏侍母太原城此日吳興路愴然感嘆生丘
園煩束帛忠告愧干旌况此故鄉遠啁噍燕雀情

金陵中秋

甲申

積葉空齋坐羈魂倦不支他鄉愁對月多病強裁詩國
事存諸老江風冷一卮昨聞淮上壘軍氣振熊羆
相看難成寐涼風動水湄棲身何地可乘興此宵宜榴
葉承虧蔽桐陰覆合離無端思舊歲照我大行陞

贈沈崑銅

慊慊太平路曉鐘促做裝濟流慚苦葉蠲忿寄青堂豈
必才名誤堪為吾道傷邇聞淮渚上師旅正張皇

牢落靈墟酒苑枯賦所遭星應潛處士烏許註功曹一
殺供人快頻揄恣鬼勞綺疏蕉葉雨蠹腐舊離騷

阻風登天門山同九玉

一雪動旬日積寒凝客舟凌晨來古寺敗葦咽殘流債
帥紛難數封侯志未酬何當采石上醉弔謫仙樓
寒日江天暮丹爐對客罇憑欄翻野馬簸浪拜江豚樹
蘚連身古山蘿得勢尊籜冠餘短髮足不下松根
望望鍾山路逆風吹日曛長年紛入市舞袖半從軍乾
鵲何林去荒雞昨夜聞飄零感歲暮日斷楚天雲

冬夜讌集

他鄉值歲暮濁酒對層冰孤緒易爲感散懷殊未能流

焮促凍草晴雪帶殘燈可有寒園夢明朝許細稱
訖不得安謀無端歲且遭土風祠蜜餌旅况澀乾餽舊
宇清江浦高藩黃鶴樓材官來帝眷雨雪正彪彪

識舟亭同劉公勇

江色來亭上高寒滿萬羅遙天傳雁陣冷石咽漁歌古
北風塵暗西安戰伐多三山青不改樹杪澹金波

丁隆吉墓

一棺攢客骨曠莽著荒丘護國殘鐘夜蕪陰落木秋互
壺耦穴住白浪湧江流不盡山陽淚他鄉憶舊遊
平生磊落意伊鬱孝廉魂古瓦沈秋水初楓染斷垣尚
聞行李去無復老奴存珪冷蠓磯月青蛙入舊軒

王渭筭墓

蕪陰來哭爾蕭槭及秋晨衰草他鄉淚冲齡半世人聰
明真宰妒筋力戰場辛無地藏英物風回揚子濱
殘魂真惜汝披棘認崇岡處世同朝露鐫碑註夕郎寒
林羅椽栗華髮痛耶娘咫尺賢書鬼相將入故鄉

乙酉春客秋浦故鄉蕪穢胡鍾郎館我池陽馬倩
若奉差詔復至長安兄弟遂得三人

五載粵東客飛廬萬里來關河叢涕淚星物但徘徊花
燦錦駝馬草薰文選臺他時郡國志流寓傷君裁

太原重九日百死罹憂身杜宇眼中血鬼門關上人泣
呱經癸甲母亡於癸未九日灰劫憶庚辰飄梗嗟何及能忘京洛

塵

聞建德東流破

二邑相連陷不知何處兵長江未可恃天道亦難明怒
雨崩鯨額沉谿度虎聲東南王氣在拜手祝金陵

僧院七里

萬樹綠相學竈觚連水灣菜花分竹出雨氣著苔閒喜
遇蓮花界如遊檀特山塵勞憐底事午夢落雙鷗

春同王九玉張箕疇遊杏花村尋坐三聖菴中

共憐花事老游思未能緘竹影沈杯綠山容入望饒春
浮雲溼樹雕窟鼠憑巖杜子真如在遺踪問木函
不謂傷羈旅此生雲鶴甘松毬方滑屐榆火正燒龕女

曳三春態山拖五里嵐方塘碧水靜柳髻正毵毵
寓和甫園東發若子相

柱石今誰賴樓船薄帝京徒然勞秬鬯悔未惜繁纓烽
火邗溝夜蟲沙姑熟營可憐南北史又復記皇明
撥杯讀往史夏院每蕭森皮結枿欄重花敷蔭葡淡鼎
鎗憂未已蜂蠆苦相侵誰撰景純賦徒堅江表心

山居

紅藥空相對清谿每獨尋蠹蟻豐草立胸臆暮堦吟數
學荒兒久通侯報國淡商於殘戍壘回首一沾襟
積雨方朝霽東山小屋喧蛇師緣竹杪輿父抱瓜根徒
見新林渡無聞滬瀆屯何堪舊相國飽載入閭門

再聞

徒然揮涕淚兩至友人書不見六師作空憐九廟墟關
山來鐵馬將帥負銅魚回首新豐市依然漢帝居
中興成底事灑血謝熊羆灞上無堅壁符離又喪師庭
花箋曲日桃葉渡江時却笑黃冠悞同歸一死期
君在蕪陰死今宵夢見之聊爲李翰傳再賦杜陵詩國
事金甌破天心海颺吹皇輿三百載誰與競鬚眉

谷菴喜次尾九玉見過

遂能攜手至欲發且逡巡堦雨玉芻長林風黃鳥頻花
臺沉夢蝶懈眼射遊人白社嗟何晚甘蕉自許身
不謂里中寺來游始此年溪山誰杖履書帙供餐眠旅

次逢秋浦高枝急夏蟬可能杯酒外相與證青蓮

寓高田將復移居七里吳次尾緒倩發若和甫幼
莫子相遮留谷潭菴賦此

逆旅稱家術慙慙兩月中能無思代馬猶未厭雕蟲蜀
郡浣花叟周南太史公何當返北棹蘋末起秋風
別離良獨苦况復是心知微雨青蒲上斷橋殘月時思
互同作賦招隱各裁詩回首天涯遠雙蓬鬢欲絲
感君情繾綣遮我過招提秋浦未歸李秀山今姓齊教
兒慚刻鵠蹠友負聞雞孟六襄陽去詩名滿大隄
晨興髮未疏接得小兒書爲報諸君意梳攀遊子車高
材堪逐鹿彈鋏恥歌魚廡下從今賃端居賦遂初

谷潭菴胡王中來畱飲松下

山關南北路屐齒到從容活活楣前澗陰陰屋角松雄
虹插地肺靈瑣決人胸坐看石盤上墮藍出亂峰
山行四十里蜷曲到瓜田看我忘三伏知君踰五年青
楓蒼鼠擲斜嶺老猿懸款款綠沉裏衣縈萬壑烟

再至池州

二月齊山上孤亭入翠微重來紅蓼發再見錦駝飛秋
漲雉城矮塵生塞馬肥傷心江漢水猶未片帆歸
箕疇覆江得不死

畱得餘年在茶鐺倚病軀良朋今有二生死直須臾方
信水難玩旋知天可呼故園佳節近誰共泛茱萸

那知天塹內白骨變紅顏憶過烏林寺同看赤壁山魚
蝦慶弔裡神鬼醉醒間却笑孤燈下鮫珠溼翠鬟

寄懷吳橫溪

好月并州夜離群計五年狂歌誰共酒患難幾呼天君
父歸殘夢身名等逝川不才我與爾往事愧凌烟

雙清閣同夏使君

有引

順治戊子夏五月提師入黔道經邵陽藩使者
夏公揚名與余同官晉陽友善再晤於茲八年
矣邀飲雙清閣是日密雲變黷無風熱甚散去
後二日攜門人張鵬翼暨兒子始起復來兼小
船渡河問北塔再旋登石級入竹路溪曲得寺

歸又同遊者為淑浦令雷鳴皋也

同作并州吏別來逾八年蹉跎空白首遲莫未歸田曲
檻憑蛟窟流雲侮佛巔揮杯邀石丈醉倩北窗眠

楚郡何頻陷沅常與靖州蒼生孽未滿恭順去難留俗
自傳青鬼冠仍着沐猴欣聞兵馬使解纜武昌樓

蒼寒入石路綺閣俯江邊剩此高山寺猶刊往代年青
崕藤竄鼠孤塔雨鳴泉香稻污邪綠爭如故國田

二水清如許環流寶慶城青林留客坐舊雨溼鐘聲天
末憐知己南方苦用兵紛紛車馬夢回首故園情

翠靄微茫處孤亭暮雨時茂林群寺出長笛一僧吹遠
拓夜郎地重開武帝池匡襄慚大業六月自王師

寶慶送張圖南丁憂還德安

七月邵陽路臨岐送汝歸碧梧初落葉荒郭見殘暉雲
氣桃花洞江聲黃鵠磯獨憐疋馬去雙淚溼征衣
記度洞庭水湖南葉再黃苗民猶負固佗尉尚稱王橘
色寒衡麓秋風緊漢陽可能忘竹帛來共老都堂

湘潭秋雨

九月湘潭縣征車苦未休蠻歌三爵罷簷溜一燈秋鄉
思雁峰頂浮名蜃市樓昊天亂靡已烽火報荊州
恒雨真無賴飄搖黃葉天壁蟲爭作夜雷響乍如泉宋
玉初悲後媧皇未補前憑書報魯叟麟筆紀何年

箕疇墳

斯人胡不壽零落紫山春按古披金簡傳家厄石麟夸
門梁苑雪燕市馬蹄塵遮莫前朝事傷心問舊人
往年南下日別爾在牀頭不記作何語相看淚各流舊
交新雨散故國老鴉秋慘淡徐州月猶懸燕子樓
塾師同負笈略記少年場奇穎君稱早飛揚我獨狂鷄
聲催曉月芳草逼橫塘底事都成夢孤墳春柳長
鼎湖龍去後避地在南方舟覆君猶在夜闌燈共涼何
當牖下老不及白頭亡猶有烏栖樹牛衣泣汝傷

庚寅七月自登岳還至衡湘東岬忽見白鬚二命
姬人拔去

昨日衡山道猶誇未老身何當螻首下忽作燕毛人去

惡原當盡拔尤寧厭頻風光憐白傅博爾一時顰
逼人何太遽薄雪到長林無髻堪陪汝守丕良苦心宦
途容此少爾輩惡他淡拙矣安仁賦二毛憂見侵

庚寅衡山初度

衡嶽清涼寺一年三過之老僧能愛我初度况隨兒短
髻風還勁孤舟雨亦奇梅花南國早開遍舊來枝

過洞庭

湖南四載客今識洞庭君岝黑鴉成壘沙明鷺悞群蛟
龍還割據草樹此平分禹蹟九江在春生極浦雲先是陸行
誰說洞庭濶今纔受一舟江豬迷舊窟地肺結新丘脉
絡通吳會風聲壯岳州適來不渡此應亦負南遊

水勢雄秋夏我來正月初傳聞八百里今見果何如氣
槩還張楚江山舊起予黃陵祠上井可有寄來書

兩月湖光裏舟中望岳陽風雲何慘淡蛟蜃見行藏短
髻誰知已低眉憶故鄉巴陵堪買醉春色報垂楊

荊州晤劉生

劍光浦川人

南郡干戈壘蒼生喘未蘇林猶啼怪鳥雨尚嘯封狐羈
旅空才子雄風舊霸圖蘭膏鄉夢裏十載大梁都

辛卯春暮同座師薛相國兩郎君出遊西郭看鐵

鍋歸集真武廟

是日來西郭春風盪馬頭高臺唯見寺老樹但呼鳩土
蝕前朝鼎城傳故國侯湍流舊無恙浴鷺滿平洲

春郊時極目猶是舊山川殘堞浮圖出晴煙燕子旋枯
僧淡蘂後野鷺夕陽邊片石成今古還鑄隆慶年

辛卯夏中鄉送菊溪之商州

百二山河在星文動使車腰鎌入麥阪曉露溼葵花戰
壘潼關暮垂楊渭水斜邵平如可問寄我舊時瓜
雨散前遊日傷心意國門不才我自棄有子在中原殘
戍干戈壘荒城虎豹屯三秦定有檄早晚去戎軒

明遠頂同薛爾儼爾昌兩世兄

宛東郊

騎馬東郊外堤邊芳草生憑牆倚老樹隔寺見流鶯青
黛餘殘照白沙環舊城炎精飛雉處突兀暮雲平
南陽城外寺紅碧只三層攜榼聯同輩鳴鞭問老僧雨

倒前朝樹牆畱十丈藤春來啼布穀猶傍漢家陵

昨日春陵道傷情二里橋殘香逐蝶化勝事與烟消麥

阪猶朝雉荒臺見晚樵南都賦可作橙橘雨蕭蕭

棗陽東野憶王布衾

泥塗思老友此地惜重遊水寨魚蝦少荒墳薜荔稠故
人猶繫馬新雨正呼鳩賸有青氈在傷心問白頭
長年不可見舊舍水之濱無復蒼龍杖難尋化鶴人春
陵氣已盡峴首淚如新莫怪西州路征車痛轉輪

別江寧令牡丹丘

此日江邊客他年晉水人相逢憐異地老去欲沾巾舊
夢銅駝陌新詩寶馬塵鍾山松柏路况復化為薪

小孤山

辛卯八月

煙波望不極兀湧一峯尊樹奪蛟宮入日吹鼇背昏何
當插地肺從不見山根一片鄱陽石比肩呼弟舅
江心起柱石獨立削青銅浮玉稱東帝大孤森兩雄客
身窮鳥道寺脚踏龍宮八載名山約今朝喜便風

池州母誕

辛卯

八年不見母飄泊况他鄉攬鏡憐華髮稱觴憶北堂蘆
花秋浦黯木葉禹山黃封樹思先壠愴悽未合防

辛卯中秋再泊九江

有引

乙酉八月十五泊舟潯陽皎月對酒望匡廬山
在眉睫間今八年矣會辛卯秋適有金陵遊溯

洄鄂渚復以是夜繫纜此處殊不見月看廬山
蒙蒙略辨因念八年來天道人事為陵為谷顧
予前後兩遊不先不後俱以是夜作廬山過客
亦佳話矣

八年如轉轂兩度此中秋好月難重邁空江只自流蘆
花慚地主鴻雁識征裘轉覺廬山好多情不在遊
廬山五嶽外獨自結奇峰兩度來雙槩孤踪欠一筇江
邊呼白鷺天外暗芙蓉不見潯陽月淡杯度曉鐘

九日沙洋舟次

此日思吾母重陽忽九年短蓬新歲月雙淚舊山川客
火紅蓼岬暮鐘黃葉邊征鴻來不倦猶自去南天

池州母誕作係辛卯年此九日沙洋舊刻又序在辛卯中秋後可見亦同一年作前此乙酉蕪關九日賦得菊花從此不須開詩有恨他九日菊摧我百年萱云云蓋祖母生於八月六日歿於九日公每遇是日必有哭母詩今集中或存或不存以公生值戎馬倥傯之際藁多遺失今止就存者考之亦可見公終身之喪無日忘之也已丑三月日男擗泣然謹誌

和王覺斯先生哭新野二馬公詩 有引

先生辛卯冬奉使蜀還道經新野哭康莊九達
二公於其第時先生病甚歸孟津之次年壬辰
正月以詩四章寄冢君雲孫二公與先生四世
交誼也詩後跋禹峰知必屬和共成一卷懸之
祠中云云閱三月乃聞公訃予往弔歸雲孫乃
以前詩見寄索和因和之哭二公兼哭先生矣
星車來蜀道灑淚漢皇城古驛飛殘雪檐帷欲二更中

原文獻盡白晝虎狼橫生死交情裏山川見哭聲
萬里關中路單車白水鄉長安憐舊雨殘夢憶黃梁御
禁還鴛鴦沙場老驕驕尚書冬日淚衰草暗斜陽
心知與世誼到此只山阿雪苑畱歌舞藥欄飛薜蘿西
州情自劇河內恨偏多回首洛陽道其如白髮何
如公亦復死枉自哭詩魂散矣長安雨傷哉白水村攀
藤來鳥道策杖過龍門豈意中台圻華堂酒未溫

狄陂寺

在鄧城南五十里一名鉗盧
壬辰八月

狄陂纔繫馬古院倍堪憐茂草埋前徑落紅流暗泉雉
飛老佛頂兔立臥鐘邊幸有蒼苔護碑鐫弘治年
我聞王太守弱冠治穰州召杜人空往河渠書尚留荒

言史詩集卷之五十五言律上
五
陂啼布穀老衲飯黃牛
鶻語真堪驗蕭蕭蘆荻秋

宛南晤黃學憲兼憶令弟源簡師

舊雨勞殘夢蹉跎十八年
荔枝肥海國鴻雁斷南天空
執郎官戟難忘圯上篇
君家荆樹好分植草廬前

春感

只尺西山盜遊魂尚未擒
孤懷惟白雪病骨且長林
黨錮畱張儉時危憶郭欽
無端霜髮裏歲序復驚心

上元

上元又復至敢自負深杯
細草長年綠百花今夜開
封蛇驕楚甸河伯吼梁臺
幾夢金門友長安使未來

臥龍懷古

帝里荒岡迥人傳蜀相居
空階聞雀語危石讀蟲書
王業成三顧臣心在一廬
中原猶割據東伐意何如
憂此中興地重來擴漢疆
憂時還抱膝遇主起南陽
天意畱神鼎中原見假王
老臣不盡淚白水自湯湯
躬耕原此地更莫問襄陽
涿郡風雲日東都戰伐場
吟情留管樂兵略走關張
六出能無死雲臺未可量
山東梁父日已抱漢家憂
郿塢初燃董樓桑已識劉從
王同白水遇主似陳留
蹉跎張鄧業流恨失荊州

林居和戴經碧見寄

畏日長林下何人共一觴
休心同槐木過影見鷺黃
大業留華省雄心付戰場
相期重載酒白水醉斜陽

亂離經十載慷慨且呼觴國計留甌脫將軍失大黃時楚
氛尚熾密林惜夏鳥山纍滿秋場既遇漢文帝何勞哭洛陽

癸巳六月十四鄉雨書懷

凍雨來何急村波沒樹腰漏屋驅仙鼠危枝墮馬蝟蝟

為仙鼠蝟中最不辨白門練如觀赤岍潮羽書南國緊兵氣

大者為馬蟬不曾銷時王師駐寶慶

小水能畱客崩岨未有橋村居忽十日淫雨過三宵溼

樹宛童落腥風醜扇搖長安莫更問生事寄山樵爾雅蝟醜扇注

好搖翅

一夜西岡水土門洶欲平無人更載酒有旅尚盈城莎

薛緣牆上雍渠得意鳴問蠓何所為喧沸過三更

帝心不可料雨澤真無窮窪土藹車死喬林負雀雄近

床饒濁酒隔壁見長虹念此不能醉馬蹄吾欲東鸚音淫鵝也以

捉雀名負雀

五年不出戶今日復離城舊鬼陰宵哭殘花半樹明空

山聞鑿木夏日見商庚海內誰知已離群感又生爾雅鴛鑿木

東佟懷東中丞大梁兼寄聲周元亮

秋雨畱新爽山花滿汴城故人餘蜃海藝苑走蠅聲往

事新亭酒孤懷廣武營信陵坐上客若箇是侯生

猶記一杯酒秦淮古渡頭乾坤贖老革魚雁割鴻溝竹

種辛夸塢詩傳杜若洲遙知海國使舊夢落穰州

七月十九聶元賓庄是日次兒京至

蜻蜓非一處禾黍間秋場兒面增鰲黑客書題正陽隕
垣迷黠鼠商葉老霜螢見說河防急丁男滿大梁

城西三十里古道半泥沙驅馬臨湍縣蕭蕭黃葉斜衣

冠猶洞口鷄犬自山家何處嫖姚壘烟沉水一涯

去冠軍里餘傳

張村寺

疋馬逢秋霽殘碑入廢塵土垣餘茂草山堡見桑田魑
魅憑人嘯麒麟傷塚眠商飈吹不極落葉滿晴川

冠軍城

舊封傳戚里知是漢家侯五劇蓬蒿滿荒村薜荔秋江
山存石馬風雨入鵲鷗莫問臨湍縣黃沙古渡頭

官舍烏巢

春煙彌望裏偏占最高枝卯翼誰能禁鴟鴞未敢窺方
知憑禁樹正好護佳兒分付東皇主莫教風雨吹

聽友人談密縣松高十五丈

百里蒼蒼色冥濛曉日高蒼髯分嶽雨白鷺濺江濤偽
爵羞秦帝雄風拔虎牢消磨萬甲子大地見秋毫

道士巾

低頭思往代羽客自堪奇共羨綸巾好休教白髮知龍
章司隸盡虎士典刑垂長劍陸離者切雲空爾為

虎賁士
貌似中郎

一代時王制我冠化作塵侏儒近逾飽優孟一番新誰
漉籬邊酒猶存墊後巾聖恩高莫戴嗟爾觀中人

甲午除夕

五十明朝是孤燈且半酣青雲辭魏闕白首老江潭楚
國餘三戶柴桑見五男橫塘楊柳路策杖許溪探

乙未元日

短髮羞窺鏡今年更可憎餅梅還慘淡廐馬故峻憎笑
任來高密兒疑是景升故交零落甚貰酒問山僧

一松亭

騎馬東郊外寒煙入望來隕隍還寂歷廢壘故崔嵬
母屠酸棗山樵陷野梅戍兒腰羽箭時見獵禽回
行行春又去白髮逼人長半靨桃容濕通身柳骨狂呼
盧遮別墅牧豕過隣墻取較羅城裏幽心未可量

老儻雖尚在傑閣更無存瓦雀譁生客棠梨識舊村經
營都腫樹溫飽在衡門斜倚黃牛背漢書時一翻
距城剛五步便是自繇身猶用前王臘休嫌四壁貧竹
松開委曲巖壑譜清新海內傳佳句羞稱慶曆人

銅雀臺

離宮何處是往事倍增愁霸氣潼關外文心赤壁頭明
珠埋舊草鬼母哭荒坵暮歷寒烟裏西風菡萏秋
英風不可見落日下孤城綺閣雄狐據銅臺勁草生乾
坤開閨統兒女戀多情松柏西陵路似聞鞞鼓聲
薄暮臨漳道悲風何處來西征元有志漢業未曾灰氣
壓鮮卑外名成官渡回一坏香履盡千古大行隈

舊都凌趙魏，硤碑此臺高。短賦餘橫槊，雄心見捉刀。山
河難誓漢，曆數竟歸曹。滿目沙場淚，朔風摧斷蒿。

信陽西乾明寺

乙未七月廿二

崎嶇千里路，驅馬泌陽東。暑氣晚猶酷，山身遠不窮。僧
當荒歲老，蚊是早秋雄。依舊寒堦下，蕭蕭旅夢中。

申陽晤丘魯瞻夜坐

竟日輾車輪，晚山秋氣新。鐘聲催旅鬢，蟲路妒閑身。王
化周南地，華風江左人。良宵千里共，思與季方親。

孔哲按光固坐署中憶之

同魯瞻時攜
兒始起北上

蒼梧山下別，六載悵離群。淮水來何暮，秋蟬不耐聞。紫
荊花下酒，鴻雁嶺頭雲。展轉不能寐，剔燈為憶君。

迤邐安昌道，危溪著板橋。山農常畏虎，客路但聞蜩。別
淚思南粵，殘年復北朝。蹉跎非一事，獨立向中宵。

晤汝下李一韓

曩年遊楚日，得子固陵書。一札何曾報，多情媿不如。豈
知淮水上，竟似大梁初。白首秋風裏，荒城落葉疎。
鈴閣秋烟迥，南湖草滿堤。戰場餘斷鏃，石馬臥黃泥。晚
照薜蘿瘦，天寒烏鵲低。殘碑荆棘覆，無路覓淮西。

因王鵬起思太原舊遊

管涔脚下路，還憶少年遊。夢裡名山改，尊前白髮秋。邊
風吹畫角，旅雁過譙樓。無限并州淚，逢君緇陌頭。
往歲鳴琴地，今聞塞馬嘶。青苔迷畫閣，翠羽醉征鼙。日

落岢嵐暮雁飛句注低華顛思往事強半太行西
舊遊真隔代奚但感黃墟煤窟藏山鼠戟門跳野狐毀
身誰報主忍死未存孤剩水殘山在沙風日又晡
墨綬他年客翻然牽旅魂石田餘戶口羯鼓厭王孫土
蝕隋宮瓦花開李后村沸脣天地滿無處覓劉琨

中牟道

濁流無定渡走馬逐風湍纔至河南岸應知薊北寒隋
堤楊柳禿雪瓦故宮殘廿載兵戎事行人掩淚看

宜溝驛飲喬鳴軒馮秀才

西山新黛綠頽壁老沙鳴策馬逢亭長關心問友生殘
風催薄暮缺月帶層城廿載黎陽道蕭蕭白髮明

仲康祠

循良不可見往事記中牟下邑畱殘齒馨香薦一丘林
獐爭壘出雪壑帶春流無限前朝淚傷心古渡頭

衛輝投張調鼎觀察

予戊子與公及徐總戎共
守長沙今丙申十年矣

憶作長沙別悠悠十載中關河豺虎裏歲月死生同舊
跡真如夢重逢盡是翁行山萬古碧好照一樽紅

聞爾蒼梧去威名百粵尊何期來蕙苾猶未奪崑崙歲
序孤鴻雁干戈老夜猿十年炎嶺外零涕對華軒
共作湖南牧我歸君亦歸白頭空被放血戰幾重圍宦
路憐同病春山見落暉共城泉色好把臂問漁磯
幾醉君山酒同看岳麓雲別來誰念我夢裏數逢君鐵

騎關山黯金甌歲月分潭州餘父老淚隨舊將軍
磁州晤湛虛司馬公會為兩廣總制
廿載鄴城路征鞭十度過故宮妖粉盡舊壘戰魂多歲
月空三徑山河老一簣嶺南銅柱在風雨黯嗟峨
南渡倉皇日桃花水上舟王敦終禍晉庾信竟歸周國
事苞桑失天心碩果留韓仇應已報好共赤松遊

讀史亭詩集卷十終

讀史亭詩集卷十一

南陽彭而述禹峰甫

五言律詩下

石城晤門下士

常寧刻集

列帳談經處淒涼此再過一身行老去諸子更如何成
白餘烽火大洪翳薜蘿憂憐羊太傅遺淚滿湘波

漢行雜詠

倚徙孤篷裏遙憐江上村鷓鴣啄蔓藻烏賊湧朝暎幕
暗垂楊曲牕搖素女魂可知愁病眼別有物華存

郢州

在渚風無定郵程故不前禿鶯頽岝外燕麥廢村邊旅

夢關山濶鄉心羽檄懸江雲望不極彷彿見晴川

長沙送傅對揚還山東

其先官秦被謫
茲不遇當事去

長沙逐客地萬古共悲辛况我浮湘日因君去國辰虞
卿終棄趙王粲合歸秦海霧茫茫裏漁竿何處詢
樽酒江城暮帆懸嶽色孤天涯憐謫宦世路齟鴻儒鷗
沒田橫島鼃鳴范伯湖良書期早寄天地幾吾徒

長沙送李欽鄰之官賓州

誰謂長沙遠還看嶺外行蠻烟開象郡天使過龍城檄
攬迎車色鷓鴣殘雨聲職方猶未盡好報日南平
赤日蒼梧路行旌望欲迷三湘猶畫角九郡自征輦廢
驛舛蛇壯殘山孔雀低車書今萬里攬轡見雕題

湘行卽事

溯流湘水上竟日見青山雨急寒臯冷樵稀古度閒漲
生昨夜雨崕疊百重灣憔悴征南客何時奏凱還
山坳成水次濁浪奪清流未免天吳喜徒教孔雀愁朱
房隋豆菟青壁腫扶留亂後墟烟少無人問橘洲
慣作湘中客重遊復七年晚蘭何處是茅甌只空傳雲
氣吞山股藤觔鎖樹肩小麝不畏客覓母到沙邊
秋雲排不盡水裔泮無垠貧簞適得志鷓鴣欲凌人賓
縶遐荒斷牙璋幕府頻獨憐衡嶽色一看一回新

縶音集
左賦縶

賄紛紜縶
蠻中貨名

衡藩舊邸酒南將軍

王孫不可見，舊邸作軍營。共羨巴渝舞，忽聞羌笛鳴。玉
堦桐影碎，碧瓦露華盈。十載南遊客，愁心一雁橫。
又是悲秋日，初筵動旅情。若能為楚舞，何處得秦聲。翠
羽當軒媚，紅粧耀甲明。興亡成底事，灑淚忽沾纓。

寄黃抑公公閩人名中通，是為吾師阿咸。今作永
州分守，予舊地也。湘東別六年矣。

湘東一片地，曾記共銜杯。別憾六年久，艱虞萬里來。昌
黎慚幕府，江夏見雄才。鈇鉞潭邊樹，勞君仔細培。
騷屑真無賴，從軍賦遠行。瀟湘猶旅鬢，天地忽秋聲。隔
代憐師友，南陔老弟兄。向來跋扈意，不敢對君鳴。

湘行

彩鷁晴江去，諸峰隨我前。半年空駐馬，七月始聞蟬。老
樹吞風吼，孤簑釀雨眠。南來何處客，莫是武昌船。

長沙中秋同夏人淑黃煥甫及次兒始騫小飲

相逢真不易，况復是中秋。對此金飈動，空憐白髮稠。關
山還戰鼓，天地自清謳。饒有胡牀興，何須庾亮樓。

只此十年內，長沙五度過。丁亥戊子及庚寅
辛卯暨今丙申其如今夜月更

照旅人，何帶甲三湘。滿愁雲九郡，多親知南國。酒老鬢
更婆娑。

萬古天邊月，人傳此夜明。浮雲無處著，天籟忽然生。霄
漢流雲母，乾坤貯水晶。倚樓何處客，惆悵故園情。

丙申九日

是日為母忌辰，母下
世癸未十四年矣。

客心無節序難過是重陽異國人空老鄉園菊已黃寒
鳥嗥斷戍落木抱迴塘獨有終天淚年年向北邙
枉渚悲風急南鴻幾度過征衫空歲月短髮滯關河劍
是王陵苦檄如毛義何可當卑溼地暮雨入湘羅

丙申初度長沙送次兒始騫歸鄧

長沙今送子五十二年人相府空留滯歸途獨苦辛江
山撐戰骨歲月黯傷神莫把封侯志荒唐給四鄰

十年彈指過今日又長沙蹉跌心猶壯飛揚鬢已華長
征愁歲晚久客奈天涯誰共屠蘇醉江城隱暮笳

子遊長沙始丁亥

送陳自修使君之潯州

三湘猶帶甲五嶺尚征輦坐惜斯人去何時手再攜鷓

鴟啼晚驛桂蠹落晴谿千載桐鄉淚六門堤水西

丙申除夕同袁叅嵐李臨淮黃煥夫家弟昉聖守

歲

四時成過客此夕倍難留屈指衡陽路衰年五度遊天
心容虎鬪歲序裂鴻溝兒女天涯意征人竟白頭

丁酉元日同袁叅嵐李臨淮作

百年已過半歲月復天涯况值辛盤薦難堪旅鬢華日
南調戰象幕府散寒鴉風物如邊塞人傾乳酪茶

潭州晤汪學士煉南

往事燕臺月淡杯度曉鐘何當經歲別况是異鄉逢怪
鳥鳴花戍奇雲倒雁峰誰憐俠骨盡瘴雨暗芙蓉

長沙送唐廷碩將軍旋歸

文昌推上將朱鳥捲蚩尤旌入蛇盤渡笳吟雁陣秋
花搖漢水楓葉染蘆溝若問牂牁路唐蒙此舊遊

長沙送雪肝歸翼城

天涯成聚散客裏送君歸澤國賓鴻下霜程落木飛
他鄉誰共醉老淚忽沾衣姑射神人在誅茅傍翠微
天子方南顧湖湘未罷師歸鞭逢雁陣子舍遂烏私
秋色綿上晚宦情桑落知蓬根良可念重晤是何期

寄池州劉輿父吳緒倩諸子時客衡陽

石城南去路險陜見斜川訪子深林裡騎驢小徑邊
中原無祖述霸業夫孫權回首江東事驚心十四年

飄零吳會日喪亂寄餘生豈意寧南檄終成犯闕兵
龍鬻紫塞鐵鷄度金城往事都如夢江流六代聲

衡州送次尾冢郎吳孟堅歸池

鴈峯山上酒送子去江東吳楚方飛輓滇黔未掛弓
存孤慚李固後死愧臧洪無限新亭淚秋花滿故宮
異鄉驚汝至臨別倍淒其幾作巢中卵猶存袴下兒
孤舟蠻雨歇客路夏雲垂壁裏遺經在無為學廢詩

劉岵岬校衡竣將駕芝山

公吳人

南薰披祖帳鄴酒酌青湖荆貢亦浮洛楚風今變吳
絳紗籠翡翠鐵網得珊瑚回首東京事春陵氣未孤

戊戌春寓清涼寺

咫尺湘干路香堂狎鳥飛重來雙鬢改所寓故僧稀夜
雨青林墜春畦紫蕨肥炎荒還鐵馬何日解征衣
百戰衡陽地鐘聲水一涯徭蠻連百粵舟楫帶長沙鄉
夢早春雁邊情薄暮笳還看銅柱近搔首問年華
送黃抑公從軍

聞說沅州下羣雄一水西漢中還借箸關外滿封泥帝
節蛟龍繞蠻雲虎豹啼檄文難父老仍是茂陵題

安仁東郊彌陀寺

遠郭山藏寺此中應有人花藤纏豹股老樹學龍鱗屋
角雲爭護鐘聲雨乍新金剛門外草髣髴見前身
曲徑迷青靄僧雛出樹根偶然驚客至即此是山門苔

蘇仇官長輿臺惱世尊却憐霜葉路歸騎欲黃昏

謁杜祠

傷心天寶客遺蛻重衡山水落魚龍窟魂招屈宋間好
花隨地發落葉趁秋閑便遇魯麟筆公詩不用刪
如公原未死疑塚在江關靈武君臣後詩名天地間亂
離來白帝談笑老荆蠻萬古郴江水東流不肯還

晤寶守傅和鳴

以下攸
縣刻集

他鄉喜汝至把酒醉高岑瘴癘山川合干戈歲月淡獨
憐老病態又觸別離心匹馬滇南去晨風寄好音

烏符觀

山月留殘魄蠻荒賦遠征諸峰含夜氣一鳥入秋聲老

寺繁雲合危橋古木橫時方憂旱魃况復未休兵
詰曲零陵路殘星髣早窺嗇夫紛列炬木客避前麾香
稻高田死徵兵寡婦悲風塵遊已倦尚復滯南陲
卜夜征途裏真同秉燭遊偶然一寺觀引我到林丘半
嶺笙簧度方塘菡萏秋仙人不可見遺墨滿山頭
樹腰忽有寺况復帶前溪饌客炊冬筍司晨仗夏雞藥
苗瘠土瘦瓜架夕陽低襜褕空惆悵蠻山徧馬蹄

浯溪

扁舟今再至倉猝憶前遊削筆蒼龍躍枯枝怪鳥愁江
山傳過客曆數記靈州不盡漁陽恨瀟湘日夜流
南荒稱二絕佳句與良書落日吞殘寺寒烟噉舊廬胡

辛卯一過其下

麻萎旱後秋隼踏枝初多少遊人淚傷心天寶餘

名山畱勝蹟遺墨重千年社稷孤臣淚干戈死事傳蝸

苔十丈碣牛笛一溪烟倚徙孤亭上斜陽急暮蟬

寒澌連腫樹石徑一荒涼刺史何年去菟裘古道傷金

仙成地主狸母臥橫塘欸乃滄浪外如聞呼漫郎

東
柳江別高替看刺史時予將遊滇公以墨誤歸山

緒風催落葉孤館歇征輪對此一樽酒相酬萬里人好
朋難聚首別淚忽沾巾聖主西南顧能高臥海濱

桂陽山中晤黃生

聖世留遺老青山戀腐儒遊人方下馬稚子解提壺我

夢陶徵士人傳龔大夫多男兼夫隱談笑謝安蒲
武陵晤游漢叟得周元亮手書

誰憐離索久好友各天涯瘴海一鴻信荒城四月花君
仍藏廣柳我尚滯長沙患難何曾共臨風枉自嗟
共醉高粱月分飛忽四年餘艤連海嶠羽檄滿湖天籍
喜元豐削名從黨錮傳一書來正好况值武陵船

湘中送戴生歸孝感

送子洞庭去瀟湘一葉舟可能不共醉其奈此中秋漁
父滄浪晚歸鴻白兆稠庭闈方健在莫滯武昌樓
宦遊白髮裏無汝不開樽維楚還多士何人念舊恩餘
皇凌建業鐵馬指荆門子舍鄖山近黃花綵袖翻

自古文章客難兼義俠存孝昌維戴子此事可同論暮
雨催黃葉南荒斷旅魂相期江夏月颯縷對芳樽
藍縷開疆日談經鄂渚城相從誰古道洵美爾多情九
折湘江轉千山落木平南霜初度雁旅夢憚秋聲

潭州送王小猛從軍雲南

岳麓黃花燦雄心事遠征他鄉猶送客天末若為情木
葉當霜下秋鴻帶雨聲遙知緬甸國更築受降城
立功須萬里慷慨爾西征瀘水蠻烟合金沙戰壘橫高
秋愁雁語古戍怯猿聲同有封侯願蕭蕭白髮生

別雁峰

以下滇黔集

三年慚地主欲去始登臨便作名山別其如父老心寒

帷猶水旱持節且滇黔回首朱陵月并州淚滿襟
衡峯七十二負郭爾崔嵬萬里人將去三春雁不來湘
靈解愛客山鬼舊憐才莫謂玉關遠班生手自開

經鎮遠

山路無終極王程且未休蠻溪逢令節賽鼓動鄉愁公
解連雲母金仙跨戍樓戰爭思往日猶憶潁川侯

平溪衛訊故監軍萬年策

荒城當落日下馬且徘徊鼠向魚街過狐從狗竇來交
遊成隔代邸第見青苔倚徙蠻山內笛聲何處來

清浪衛

山曾留客住破屋著繩床燕厦蛇窺幕牛欄虎過墻荒

臺生旅穀側路見垂楊苔雨泔泔裏蜻蜓分外狂

興隆衛

微雨山城暮嵯峨指舊宮朱門弔鸚鵡別院鎖梧桐漢
業摧張耳成都失李雄遐荒留姓字往事記興隆

飛雲洞

黔山殊易了得此忽驚人象馬空中下鸞凰物外真化
工勞結搆鬼母泣酸辛不作梁州貢夜郎稱外臣
古柏蹲山脚奇峰觸面開三山湧作柱百怪結成胎海
若元身現河圖鬪寶來幾經秦亂後莫作武陵猜

重安江

灘流急暮雨勒馬憇空城銀杏歷千歲夏雞催五更花

簪苗女路鐵騎大軍營憔悴黔州客愁從兩鬢生

清平衛

舊邸朱門在高臺尚九層劉禪失劍閣孫皓棄金陵燕
壘迷今昔榴花照廢興窮途難買醉恰得酒如澗
倚徙何王殿殘霞報曉晴松巔烏曝翅瓦脊鵲呼聲羽
箭流官路環刀犵狁兵開疆須萬里回首玉關情

一字孔

席帽斜朝日猩袍鬪曉程溪山隨處艷小鳥怪人鳴白
鏹中原血黃茅瘴外晴頻年勞 聖主萬國未休兵
迢遞群峰合荒城落照間郭東餘破寺地勢舊巖關鼠
竄沙場瓦苔生雨後斑招安勞刺史兩月不曾還

迤邐羊腸路參差鹿角城周廬皆鬼國槍纍半軍營佛
火半山吐毒溪溪樹行已聞開越雋何日罷南征

安順府王將軍柳亭同石崑圃太守

羅甸逢知己飛觴酒百壺蘭膏簇翡翠白苧落穉輸蓬
鬢風塵換雄心歲月徂西南荒服外近剖一王符
六軍今出塞萬里合同車持節來荒徼王程半廢墟輿
圖九野外部落百蠻居屈指西征日潭州二月初

永寧州

信宿郎公驛茅簷送雨聲群蠻圍廢圃一澗遶荒城瓦
雀親厥喜竹雞溪岸鳴紅崖畱古峒猶說武侯營
纔過雞公背遙從象鼻行雲根一寺出石髓亂溪鳴歲

月金錢費關河鐵馬情似聞南詔使
聖主欲休兵

孔驛

到此黔中盡山巔兩樹存香粒
廢寺茅屋出孤村人語華番雜
蟲聲遠近喧如何馬太史猶未識崑崙

鸚哥嘴

行盡高低嶺坐來長短松雲烟繞一氣水石幾千重暮
雨天邊響空山世外鐘一身成老大遮莫感萍蹤

平糞衛

滇南纔入望山勢漸從容早稻平疇滿亂流殘郭重九
夸開道路六詔見提封今夜陸梁月飛尊對馬龍
路入芳華縣溪邊忽有村環山簇石笋拔地起松根苗

女雞窠課獮翁燕麥屯喇麻罈內酒何必讓金罇

昆明懷古

乾坤留閏位歲月老遺宮蔓草高臺綠雕墻晚照紅鼎
遷金馬外氣盡鐵橋東卻憶昆明戰還歸灰劫中
孫逆窺神鼎西南創帝基雲霄連象魏日月走罟魚鐵
馬雙雄斃金甌一統資交州吾郡縣莫緩富良師
山河黑水盡列第遍王侯樹老虬龍坼園荒翡翠愁鬼
工窮貝闕藻井上飛樓不盡興王感滇池夜倒流

別駿聞

倉猝別吾弟應知分手難天邊荆樹合塞上鵲鴿寒世
亂悲遊子人情妒好官西湖饒畫舫贏得幾回看

何能不爾別灑淚向滇池廉吏人爭笑榮名只自知離
尊鴻雁過客路柳條垂莫謂蒼梧遠相將噉荔枝

再別嵩岑

我到君斯在胡為我獨行銷魂惟此日回首不勝情萬
國勤飛輓西邊正用兵秋風驕鐵馬想像渡瀘聲
五載長沙別相逢洱海邊河梁人又去雲樹兩相懸嶺
外秦關路昆明漢武船板橋分手處再晤是何年

雞場別石崑圃

送我牂牁道石林餘落暉天涯寧易別知己古云稀皂
蓋彌荒徼徵書下帝畿粵山一萬里獨有鷓鴣飛
遲暮難為別相看更一卮他鄉芳草路瘴雨落花時楚

國軍書滿昆明羽檄馳可憐分手處邊月照羅施

平越三丰觀

何處尋丹鼎苔荒舊石梯陰林飛鳥過畫棟古蟲題物
色勞英主窮追到海西至今禮斗處俯瞰萬山低
城內孤峰起高臺獨爾尊金丹那更有石髓至今存老
樹猿猴掛靈巖虎豹屯團團叢桂裏鼓角易黃昏

黃平客居

萬山藏宿霧古寺帶煙蘿翡翠來溪樹獼猴飲碧波蘆
筒邀客醉椎髻聽彝歌粳稻連檣至嫖姚意若何
樹杪朝雲溼城陰喜雀斜催科勞府主戰伐自天家白
粲蠻溪裡沉槍黑水涯黔州凋敝甚群盜尚三巴

千山憐絕域六載滯他鄉
白蠶蠻中長丹書異姓王
居然開越嵩不復賦蘭滄
魂折滇黔路到來迷戰場
山雨能畱客荒城竟浹旬
黃鸝隨樹嘯乳燕與人親
有客攜尊至諸生問字頻
草堂堪送老莫是浣花濱

沅州別袁撫軍

兩度沅州路俱逢孟夏時
雕梁還乳燕茂樹更呼鸝
越嵩新開郡牂牁未罷師
五溪傳俎豆獨有馬公祠
十八年中事三經過此州
滇黔歸鎖鑰吳楚控咽喉
鐵馬千群牧牙檣百丈浮
征南畱勝蹟應在萬山頭

東安高山寺同里人邑令潘文彩飲

老樹畱殘郭高臺壓近城
客心林與靜暑氣午來清
疆

場還荆甸溪流帶粵聲
一尊同地主恰動故鄉情

送劉宓城大行西粵奉使北歸

嶺外與君別鄉思忽以增
一帆飛采鷁萬里奮秋鷹
旌節經寒暑江山記廢興
六朝還在念指顧下金陵
卽看龍節遠一棹洞庭飛
此地難為別堪兼送爾歸
江城紅蓼發故國羽書稀
莫戀東臯醉乘時入帝畿
星車來萬里百粵古雕題
椰酒那堪醉明珠未可攜
江聲來不厭王路苦難稽
略記銷魂處伏波山正西
故人逢異國幾醉越王臺
使節蛟龍繞重陽風雨來
蘆花江月吐雁陣楚雲開
為報梁園客新從交趾回

秋日寄劉公愚行省江夏憶舊

萬里蘭滄路一杯黃鵠磯那堪雙鬢白又是兩年違澤
國金錢盡炎荒羽檄飛牙籌還未歇得不念宵衣
昆池纔飲馬又作嶺南遊萬事今垂老一生終不侯關
山炎海盡瘴癘百蠻秋懷舊思江漢飛觴黃鶴樓

藤峽懷古

聞道王開府威名著嶺南良家勞士馬蚤窟靖戈鋌佗
僭纓曾繫嘉亡首自函至今瘴癘地猶自識耕蠶
奇兵萬里外直搗百蠻居鈴閣黑山夜指鋒露布書軍
中傳小范司馬屬穰苴社稷功猶偉淮南定亂初

劉仙巖小集

劉仙何處去聞在此山居鳥篆雲中額蝙蝠窺篋底書烟

嵐蒙姓字樓閣著空虛驛絡南垂客憑高問舊廬
往事留仙蹟靈巖壓日南藤蘿迷藥竈橘柚護丹龕千
仞風能肅一泓泉獨甘渥顏如可駐騎鶴問蘇耽

棲霞寺

以下粵
遊集

削鐵來青壁飛樓倚斷阿秋鐘吹木葉石燕出雲窩古
寺能留客邊城久息戈且揀今日醉華髮笑蹉跎
咫尺江東寺嬾姍兩度過榴花殘更吐布穀叫偏多金
碧當軒酒漁樵薄暮歌馬祠懸漢月不飲欲如何

送林司李之官惠州

共作粵西客胡爲君獨東孤帆更有託吾道欲誰同海
色羅浮上江程白鷺中香魂知未散

謂朝
霞也

酌酒問蘇公

送蘇司李之官虔州

異國惜分手春城酒一卮江山憐過客冠蓋憶同時驛
路征鴻裏鄉心漲海陞南昌應有賦早晚寄相知

送鑑湖歸里

有小引

鑑湖與余少年同學相善兼以親誼亂後故鄉
友朋率先後化爲古人壬寅春余客桂林鑑湖
翻然來慰我伏波山下別久老弟兄相歌也還
相泣未幾辭去爲走筆贈此

嶺外春風劇他鄉送爾歸何人憐短髮落日見殘暉亂
後江山在荒年故舊稀北山猿鶴夢傷子到荆扉
棲遲誰更問寂寞送君行楚粵關河濶歲時兒女情蠻

山釀瘴雨鴻雁帶春聲往事繁華歇黃壚憶爾兄
回首同遊盡如君復幾人殷勤猶念我瘴癘入邊塵舊
夢山河邈元戎壁壘新恥將天寶事零涕一沾巾
回思難鑄錯半世枉蹉跎却笑馬肝誤其如蛇足何青
雲遲歲月白首送干戈還憶臨湍縣秋風理釣簑
鮑潔菴以他事左遷還江東

邂逅隨成別離筵悵晚春即看江左客舊是嶺頭人才
子宦遊薄主恩功令新恭聞舌更在仗劍復歸秦
陰雨對離尊獨勞江上魂棲遲憐異國送子下吳門六
代繁華歇長江一練存吾曹還戀此豈必長兒孫

九日贈荆山

萬里江山客誰憐落魄人封侯豈不羨報國愧無因壯
志風塵老殘年歲月新天涯吾與汝斗酒莫辭頻
何當重九日恰是爾懸弧旅髻客中換年華嶺外孤天
邊傳虎節塞上識龍圖吹角鈴門下黃花蕊正敷

九月十三寄全鎮柳州

漲海傳金印飛來大將旗鈎陳明帝座玉帳下南陞地
盡羅侯表天連浪泊卑丹青應有信麟閣照鬚眉

九日後贈梅谷

宗風留柱下異世見王孫秬鬯何年錫歌鐘往日存初
鴻翻桂嶺殘菊照金尊如水填車馬擁歸將相門
同官兄與弟僅隔一牆居巧曆誠難算猶龍愧不如彤

弓傳盛業白馬紀盟書况是南荒酒剛逢雁落初

征古田日起奮二子來省

汝父西征日兒來萬里行頭顱憐雪白鼓角帶邊聲點
鼠穿千障都狼歷郡城隘名天涯還歲暮對汝倍含情

何能不汝憶遠寄在窮邊底事空囊外壯心華髮前關
河來故國雨雪滯殘年浪說成功日鐫碑記古田

壬寅除夕

時出師古田

舊曆隨時過新醮隔歲嘗節旄驚此夕老大寄殊方積
雪猶擐甲空山未裹糧 聖人南顧切何日報明堂
五十七年夜無端欲二更歲華如掣電旅次倍關情蚤
戶還抽稅駱田方用兵天涯思故國把酒淚從橫

癸卯元日

山城春又至元日羽書馳白髮猶天末青樽且歲時金
門念未歇銅柱置何期笑作蠻彝長黃甘信手持
癸卯正元日交南兩度春不應荒服地久住數奇人瘴
癘欺雙鬢文章悞此身 聖朝無闕事爭似老垂綸

徐亨若居攜起奮二子來遊

癸卯夏五月
以下續滇黔集

竹塢藏山角匡牀只舊書簪花來女伴采柶入樵廬隔
岸猿呼子晴江簿曬魚相逢無襍襪此地一留車
王瓜隨夏長任意過墻頭社燕巢茅屋長堤縱子牛握
歡成劇飲有客是中州薄暮催雙槩漁歌入夜稠
柴門連曲榭中有讀書堂洞穴衣冠古亭臺草樹長駱

田愁水旱耆舊記興亡短巷遲樽酒歸來月滿航
偶然成過從攜手到林陂曲淖香杭滿茅簷乳燕卑書
能藏老蠹花解種辛夸蠻語習來慣黃昏入酒卮

別廷甫

謝君年少客射策且專征橫槊嫺詞賦投壺借友生三
千君子在丈八鐵矛成南粵今無事何方更請纓
早歲擁車騎隨登上將壇轆轤傾壯士駉裹半材官愛
客黃金盡重圍白羽寒從來傳衛霍生長在長安

別公卜

相逢偏意外此地別離難短髮愁中老王程亂後看荔
枝百粵郡竹箭五溪灘俱是前遊地敢言行掛冠

却笑霜髭滿黔中復此行纔離佗尉國又向夜郎城天
地畱蠻蜚風塵老弟兄來朝即萬里回首各含情

嶺外湖舟

桂林城下水十步九迴灘壯士如鏖戰諸侯但壁觀蛟
涎屯黑沫鰐齒磔風湍轉憶秦皇帝能令天地寬
造化真奇巧因茲障百蠻撐篙臨鬼窟上瀨賀生還百
計留康瓠多情悟曉鬟西南天地隔何必只嚴關

桂林同陳子完馬易生王政寰三將軍討賊山中
將去黔州留別

十月勤師旅今朝始罷兵黑山無剩壘白馬竟成名雪
帳都狼驛軍書細柳營牙旗方虎臥遺孽敢縱橫

大澤何年嘯江中竟殺人中丞騰露布談笑却邊塵馬
繫桄榔樹糧舂榭葉濱向來經苦戰念此倍酸辛

陰符聞早授武庫更知名蘸血堪磨楯提戈笑請纓帷
燈山彪路暮雨荔枝城我向牂牁去臨岐感易生

同張九如衛猶箴陳自修諸君遊東山

在貴州東郭

提戈一作迴頭

騎馬東城外鳴鞭且暫停好山堪命屐雜樹故冬榮苔
溼天門路禽歡雨後亭向來傳割據把酒問山靈
精廬聊把臂風日倍堪嘉極目來前浦憑虛問落霞獠
城山磊落鬼國氣參差同作天邊客臨風各憶家

送青弁北上

常年兵革裏今日問京華六詔星河異千山雨雪賒衣

冠簇輦上書劍起天涯遙指南歸路春深御柳斜
萬國呼嵩日三春祝釐辰益州傳驛使上苑舊儒臣遊
子千山路危疆百戰身欣逢江左客天末見歸人

釐音利
與忌叶

見曹
植頌

送徐方伯丁外艱歸揚州

相逢良不易握手復臨岐所見多芳草長征更墨衰
荒留姓字友道在鬚眉萬里尊前酒迴腸是此時
好朋偏晚合送別值初春宦跡存荒服鴻鳴紀北辰
江聲雜涕淚疆場尚風塵脈脈揚州去羞稱跨鶴人
淮南風物好廿載憶前遊戰馬嘶行殿珠簾捲畫樓
蕪城京觀在斷戟海門秋底事增惆悵揚帆過石頭

黔山天盡處送子適東吳何計遲行李黯然聽鷓鴣
昆明還置戍蜀道尚彎弧六代繁華地鳴榔指舊都

水西

王師真聖武六月啓蠻疆入穴窮方略開山作戰場
炎荒青鬼火木末透蜂房除却猿梯外陰符未可量
鳥道原無路孫兵何處來崗門喧霹靂地肺起樓臺鷄
犬常年置溪山特地開浮槎星漢裏應有漢臣回

送自修先生之楚

與爾生平約始知離別難故人誰海內相勸且加餐
白髮憐同調蠻鄉戀一官還期攜手處得似往年看
之子荊州去西山正用兵離筵還此夕老馬去孤城黃

鶴江雲暮金沙磧裏聲蕭蕭秋葉下無奈是長征

乙巳七夕婁仁符呂武臣招飲白衣菴

楊柳綠無次陰森小院東危樓藏古佛繁響雜秋蟲僧
羨茄瓜長客來車馬同蓮華香梵唄清吹夕陽中

一作勿
教離別

異盡醉
藕花中

選閒聊憇此鄉里動金卮嬌娜荷花放參差晚照移窺
香來粉蝶捕鯉見鷓鴣勝地還佳客投歡良在茲

雙堦還衝寺群山半入筵滇南偏少蝎夏日更無蟬堤
花綺羅裏金剎酒杯前匝地松茵合涼風獨颯然

徼外風光異歡然坐小汀芙蓉環廢寺笑語對孤亭却
指關山月剛逢牛女勤此夜酒撿醉莫教停

萬綠幽篁外垂楊古寺西小園來翡翠淺藻帶鳧鷖薄
暮還吹角青畦獨杖藜可憐雲漢夜難得共招提
馳驅十載暮今日始言歸酒喜親朋餞時兼羽檄稀江
山還落葉伏臘且漁磯回首昆明上常看鴻雁飛

史質輔居

策馬東城路尋幽過子居入門雜花放流水漸成渠有
客頻呼酒當壻自種蔬金戈閒此地幸未有高車
小園方種菜原自飽兵符百戰愁關嶺銷兵出葉榆聖
明辭紱冕垂老且江湖策馬昆明舊猶然憶五銖

一作聊復
駐柴車

讀史亭詩集卷十一終

讀史亭詩集卷十二

南陽彭而述禹峰甫

七言律詩上

楚闈校士

篝燈灑灑映高幃
栢老虬龍膩葉稀
缺壁高臺燐未散
荒簷古瓦蝠初飛
十年夢冷雕蟲技
四月江乘黃鵠磯
誰謂洞庭衣帶水
猶遲聲教未言歸

五日贈祖靜菴將軍

虎帳巖關久濯靈
身經百戰血袍腥
黃河舊仗元侯策
瀚海曾封長舅銘
乳燕從教廻綺席
榴花况復燄山亭
君家勝事差堪繼
笑指先鞭鬢已星

入橫山

江干忽復健兒橫秋浦鳴榔卜夜行欲買奇山誰定價
試調野鳥自呼名胡牀月冷瀟湘色棋墅風餘草木聲
數畝香秔堪自老問奴應解象爲耕
青林偃臥半斜橫避亂山城以族行尉是南昌今易姓
山非隆慮暫逃名長林一悟菀枯理遠澗時傳喜怒聲
最是多情撒穀鳥石田無地也催耕

奉懷若谷師

畧記輕舟到越垂玉津園內酒盈卮歸來絳帳關山澗
夢裏銅駝歲月移商雒還能畱角里江湖豈肯厭鴟夷
風篁嶺外深秋月可似傳經燕市時

錢塘郭外奏吳歆爛醉烏程聽鷓鴣一自扁舟凌北固
只今疋馬憶西湖傷心莫問關中鹿往事深慚轅下駒
鎮海樓邊頻借問江山勝處屬林逋

母節暨女烈建坊

九原合慰祖孫魂斷臂焚身終古存華表崢嶸神禹廟
絲綸詰曲養甥村幽宮冰結玻璃乳黃土松沉琥珀痕
一死何心來譽嘆鶴鷗風雨磔山根

流寓

凌晨舟楫蕩晴霞火後山城亂卒譁萬里長江空隘險
六朝王氣失繁華殘書已盡湘東邸破鏡還歸越國家
却憶司州王閣老冷鷗煙嶼賦蒹葭

江聲鐘鞮孟婆風展轉孤舟對短篷蘆荻悲鳴沈畫鼓
關山暮雨斷征鴻武昌再下王敦死湓浦初歸庾亮窮
不謂雲烟雙玉蟠銷沉戰馬夕陽中

中江阻風有引

乙酉八月日發船安慶抵東流岸泊數日時寓
池州久聞江漢道通歸鄧荊州記江至潯陽分
九道東會於彭澤經蕪湖名為中江云
閭闔西來白日藏傍人理舵意張皇江連渤海歸牛渚
山折崑崙下馬當再有何人橫鐵鎖漫因往事笑沙囊
聊看鳧雁平洲上忍使黃花怨故鄉
五載風塵厭薄遊歸帆纔放正中秋山魈雨泣楓香驛

鼉鼓雷鳴桑落洲澤國銅符遼海使史書錢漢靖南侯
青簑擬向嚴灘去渺渺烟波一釣鉤

畫船贏得旅顏酡繫纜江干五日過蟲響荻幃憐客夢
葉翻石壁下漁簑喜聞羽檄武昌少但見舳艫南顧多
此去名山應有願千秋祖構意如何

乙酉過儀真示丘將軍飲次

有客飄零感斷蓬蘆烟蘋雨薄秋空杯涵靜竹橫牕立
幕捲喧蚊入夜雄燕趙血流殘壘外東南險據亂流中
向來五馬浮江處古渡荒寒起暮風

泊蘄州

荒汀旅夢淡秋泓促織蘆中帶雨聲舊鬼髑髏餘斷壘

孤村煙火亂朝晴垂楊葉老西河驛腐草光流夏口城
身是桐鄉思故吏蕭蕭鳴雁自南征

鄧守夏公斲人沒已二年

團風鎮

町畦蕭颯暝朝曦度越關河遊子悲被被烏裊鳴曉葉
跋跋鼪鼠冒殘籬陰陽人鬼一闕市風雨蛟龍兩斷碑
莫向南朝詢戰壘青袍如草渡江時

武昌見梅

芳華久負故園期春色江南見一枝不謂荒城仍有此
獨存老氣較難窺法曹官閣留賓日處士孤山放鶴時
旅况闌珊年事暮婆娑花影欲何之

送香巖令丹陽

乙酉夏

空江涼月映秋澄離思鄉愁兩不勝異國山河人又去
孤舟妻子病相仍臨文乍可搜丁卯酌酒先須弔建陵
古寺沙邊如借問瓜蔬夜雨憶龕僧

鍾山合沓暮烟平醜酒勞勞送客行忍向他鄉裁別賦
誰從古道認交情漁陽戰鼓闐燕月關外軍書老渭城
因子東征思國事長江未可恃陪京

戊子湘潭九日母以癸未是日殂陽曲署距茲六
年矣

歷年楚國浪遊身嫋嫋秋颺江上蘋老去慈闈傷歲月
南來久客倦風塵鼓聲未闕三苗壘柳色空殘五代人
况復夜郎行萬里晴江白石愧投綸

太原城郭憶殘暉苔篆蒼槐十二圍
悞我終天因墨綬
着身無地是斑衣
重陽每歲猶堪到
汾水東流竟不歸
此日瀟湘樓上望
北來鴻雁趁秋飛

戊子重陽前二日起兒病愈自湘潭歸鄧

颯颯金風入碧梧
晴江萬里一帆孤
初霜應自珍殘病
佳節誰堪共老夫
鄂渚月明黃鵠石
巴陵秋色洞庭湖
遙知十月穰州客
爭送隣家酒一壺

前日蒼頭報水程
襄船猶繫漢陽城
曰歸恰值黃花燦
久客初聞鴻雁聲
帝女祠邊方躍馬
滕王閣下未休兵
新恩却喜如天廣
邸報南人正六卿

湖南作客已經年
蘆荻風催下水船
送汝愁看湘浦月

一官遠去夜郎天
征車取便如安陸
繫纜無須更漢川
寄語農人多種秫
釀成春酒我當還

穰國秋酣橘子肥
家人待汝合同歸
漢陽僑寓非長計
膝下辭余只暫違
上國今年征吉士
故人曾否薦鄉闈
有書報我初冬日
莫待金山雨雪霏

歸興

穰西河畔舊茱萸
屋角白雲堪自娛
豈必名仍稱處士
此回論合著潛夫
桑間布穀聲中雨
牀下鴟夷腹底壺
楚水黔山如夢裏
投醪每自愧蒸徒

郢上阻風

郢城南去斷征鴻
日夜江聲震短篷
歌處不聞下里調

風來較比大王雄五年楚澤驚霜鬢三月長干見落紅
况是重經豐沛地荒榛石馬夕陽中

村居

有引

順治七年庚寅定南王開西粵秣馬衡陽粵郡
吏皆羈旅焉環湘東西剎觀爲盈臬司山東王
公寓佛寺距城五里作村居詩余亦繼作

良家十萬賦西征况是今王舊有名便可直擒真定尉
不須更借夜郎兵於今王祭先供楚自古南巡本在衡
百粵歸來羣吏在凱歌雜入早鴻聲

桂林寓

順治七年仲冬

錦韉短景入嚴冬瘴水蠻山十二重萬里風烟臨絕嶠

六軍談笑入崇墉滿堂簫鼓千牛酒故國江山幾樹松
西指蒼梧雲氣黯朱門暮雨濕芙蓉

粵山四望絕攀躋一夜西風動鼓鼙侯伯何人頭似鼠

貔貅有酒醉如泥

謂趙印
選等

蠻天瘴癘消金甲
瑤女胭脂散

馬蹄獨秀高寒渾不管妝臺猶傍洞雲棲

獨秀在藩邸
後宮多珠樓

再過熊羆關

南來關勢抱龍從萬木蕭森秋氣中峰接祝融鴻久斷
勢觀滄海日初紅龍旗甲度三韓馬客鬢霜催萬里蓬
滿目山河成涕淚漫云設險是王公

雲間石磴曉風吹萬壑磴砑度鳥窺將畧何人弛虎豹
關名徒爾擁熊羆揮戈直欲吞三戶立馬行看踏九疑

惟有秋山今夜月獨憐使者再來時

庚寅八月六日憶母

遺恨千年詛太行難堪此日又瀟湘安東未遂憐溫嶠
黨錮無名恥范滂不信依人空作客獨慚遇主尚爲郎
蕭騷短鬢經秋日雁杳江城憶故鄉

庚寅中秋瀟湘夜坐

一年能得幾中秋好月良宵不易酬十載光陰都作客
此番汗漫爲誰遊軍中鼓角天連水笛裏關山人倚樓
漫說蒼梧荒服外從來禹甸古梁州

辛卯三月春風閣東楊莪蓼

十載他鄉客鬢秋幸逢吾土一登樓雨中鵠鷓呼殘壘

亂後蘼蕪滿負丘社燕已過三月候流鶯還覓百花洲
浮圖自湧荒城出斜日闌干起暮愁

夏日寄懷江司馬

楚天烽火照滄浪黃鵠磯頭酒一觴建業猶存王導節
武昌又醉庾公床十年知已慚名表萬死驚魂出戰場
自笑黔南持節使牙旗空壓竹三郎

初夏寄懷汝李王介公

寂寞湍陽舊釣磯荒城落日見殘暉牛醫有子思黃憲
貉督稱奴愧陸機枕郭青山還舊臘窺園蒼竹已成圍
仲宣詞賦凌徐阮莫謂荊州不可依

漢上逢韓繼之同年

十年風雨憶連林短鬢蕭疎雲水鄉不謂士龍空入洛
却憐司馬舊遊梁杯前草色流鸚鵡笛裏梅花繞鳳凰
今日欣逢漢武帝與君莫話老馮唐

過漢口經鎖兵憲舊樓

春花同汝醉長干舞袖踰躑午夜殘一自懷沙憐太傅
更誰把酒酹郎官道逢楚國思鴻雁讀罷騷經憶芷蘭
隆慮山深棲息穩天涯有客獨憑欄

望廬山

識面匡廬已八年今朝又泊九江船白雲自傍香鑪宿
瀑布還從五老懸如此山川勞應接何時杖屨待周旋
猶聞李白經行處月裏松聲落澗邊

彭澤懷陶元亮

參差雉堞曉鴉鳴歷落人家烟火生一抹山川猶晉土
千年甲子舊江聲轉憐五斗還多事不愧八州惟此行
我亦有田堪種秫歸來一賦獨難成

牡丹丘

凝珠桂魄憶汾陽此後分飛卽戰場對客愁談天寶事
藏身多在武陵旁每憶舊遊驚似雨何堪短鬢漸成霜
石頭城下六朝水况是孤舟人異鄉

江寧赴廬長華招同陳孝求感舊述懷廬別於越
陳別於燕俱十年矣

同人餞榼置江濱十載離愁旅夢頻眼底山川古建業

尊前爾汝舊鄉隣湖光明聖猶如昨柳色高粱幾度新
客裏相逢好共醉鍾山曾對六朝人

維揚

離觴傾倒酌清醑正值西風下碧梧處世于今多醉尉
藏身何地著狂奴雷塘夢冷香魂盡瓜步山高戰骨枯
廿四橋邊今夜月十分秋色雨模糊

壬辰秋寄許素臣商山

噴岈韓嶺下秦原析酈相連如故園憶子商於六百里
願聞道德五千言窓前舊雨梧桐濕天外孤雲鴻雁翻
何處深山尋四老蒼嵐石窟紫芝繁

壬辰除夕

終年潦倒只長林最是難堪此夜心四海誰投青玉案
一身久付白頭吟小齋石塢能留雪明日春觴好聽禽
底事日南銅柱下情深知己欲霑襟

定南舊有白
子疏今戰歿

癸巳元日

春來好自醉春筵雪髮催人漸滿顛况復纔經離亂後
有生幾見太平年近聞南粵除黃屋且喜西川盡杜鵑
往事風波還自悔從今莫放洞庭船

何處逢人謀醉鄉難從烽燹話滄桑棘荒誰辨銅駝陌
蔗失空驚朱雀桁老態還能驅款段當門正可種垂楊
昨來自弘農郡莫看東都看北邙

五日東園送夏人淑還孝昌

蒲觴小苑對清池半醉重呼酒一卮自喜諸生歌瓠葉
難堪遠別贈將離黃雲壠麥生朱夏灌木荒山聽畫眉
水國芙蓉明月夜西旋馬首莫遲遲

荒城雨過水猶澌日暮斜風蕩酒旗文苑十年容逐鹿
故人此日一歌驪極目好憑鴻雁信關心最是鶴鴿詩
白頭君外無知己待汝重來倒接羅

桐風槐雨間椽櫚三徑蕭蕭處士居可奈離筵偏送客
况兼多病正愁予滄浪此去尋漁父夢澤還應念子虛
紫嶼西來多爽氣不須久戀武昌魚

遙指東南天一隅黃泥暑雨冑征途繇來作客羞彈鋏
未是臨風也憶鱸故園園林藏俎豆頻年衰白感頭顱

晉陽霜雪北堂草反哺如君愧孝烏

無端送汝別東郊野具魚蔬三四肴曲箔眠蠶新結繭
高粱乳燕半辭巢擬將白眼看時輩誰向青衫問故交
昨夜長沙傳露布喜聞縮酒供包茅

東城碧曲帶蒼曉剪燭呼觴奈短宵卜夜爭鳴惟盍旦
結巢易就是鷦鷯龍媒自許曾來宛白豕何須更過遼
華髮摧頽成底事胸中塊壘不曾消

夏日同鑑湖城南再遊黃林寺因憶向來張王兩
孝廉俱已物故

廿年此地歇征鞍杯酒同人話夜闌世事新亭流淚後
交情河內奏琴殘乾坤無地留雙劍父老猶然進一餐

遲暮不堪重躍馬長林愧爾一黃冠
荒邨鄰火試新茶野渚長堤幾部蛙却對酒壚思往事
一番舊雨落誰家葉搖晴樹連雲綠日落柴門帶壁斜
共識漢陰灌園意相期學種邵平瓜

趙聖居開府予告歸富平

大堤曲裏歌喉殘不喜彈冠喜掛冠漢水元來通隴右
華山况復近長安天馬舊從西極至鷓夷今見五湖寬
獨憐此後習池酒不共山公馬上看

秋感

桐風蕉雨對孤城芳歇不聞鶉鳩鳴豫讓何當稱國士
李陵元不墮家聲閑儲藥物防多病耻借樽罍罵不平

莫把英雄嗤廣武由來豎子易成名

酈水洶洶走白龍可能一洗向來烽魚遊鄧塔三層上
賊壓參山第幾峰泉貨年年勞大內丁男日日去開封
顏床剩有殘書帙猶伴山僧寺裡鐘

時河決連年
寇據房州

送唐修之任雲間

杏花新雨暗飛觥柳眼青青望欲平六載柴車留小吏
一春畫舫過陪京天涯揮手即殘夢海內關心尚老兵
為訪陸家兄與弟多應久去洛陽城

甲午二月過塾師翎修公墓

有引

師諱鴻翔鄧茂才負氣能文唾手青紫竟未遇
以子衿終有子三四人俱罹於亂有生者亦轉

徙他鄉予舞象時從遊受益良渥予爲諸生時
師旣下世且二十五年復無後無可以報德者
坏然一丘蕭械城隅跨馬西郊時當寒食率兒
輩拜之手植數栢爲作詩二首告其墓

新花著雨隨孤村往事傷心不可論俠骨共憐藏馬鬣
白頭誰解負龍門竇融久斷西河種徐穉空悲江夏魂
二月紫金山下樹鷓鴣嗚處易黃昏

萋萋春草對斜曛陌上新詩和淚焚東海猶傳死士壠
大梁誰守信陵墳魂歸月夜寒湍水氣薄蒼旻失冠軍
麥阪霏霏紅雨亂南來燕子掠愁雲

過井寒泉丁穎水故居

白帽青衫跨小驢年年濁酒醉君居座中半是平原客
門外常聞流水車舊鬼燐青十載後故人馬勒一春初
重來不用山陽笛籬管風吹泪滿裾

經井淵水止水故居

竹筒麥酒任狂呼記得東隣舊酒徒柘葉園中啼布穀
藥欄亭下長蘼蕪風塵舉世誰青眼潦倒當年一賤軀
攜手泉臺州里盡宦塗何處不崎嶇

宛晤張渙之翰林問晉陽諸子

十載并州結夢魂管涔楊柳浴晴軒肉生髀裏增新感
淚濕衫邊見舊痕驃騎何能容李廣瑯琊原不念劉琨
殘碑剥落斜陽外杯酒宵闌問狄村

宛邸

宛南城郭只荒園青草歲蕤舊井智香閣晚霞才鬼哭
高臺暮雨老烏言昆陽戰壘劉文叔鄴下殘垣賀六渾
頭白低垂空老去近來不解憶王孫

載酒西庄

墻頭朱果亂垂垂偃蹇繩床竊自疑淪茗時看曉鹿過
著書怕有夜猿知信陵歸國偏逃酒謝傳籌兵且着棋
况是尚方新賜劔南征莫問羽書遲

送巖犖之粵

十載南征未息戈炎荒今見重臣過渡瀘丞相還忠武
踰嶺將軍自伏波客至剛逢橄欖熟天陰慣是鷓鴣多

桂林山色曾相識為訊平安近若何

戴巖犖侍郎內召

公參汝南藩移粵西
右轄未行旋有是命

難堪分手只須臾紫陌鳴騶踏九衢共看懸旌臨鳳闕
可知補袞屬龍圖嵩山草樹秋烟迥易水樓臺晚照孤
回首東南方戰伐老臣恨不到蒼梧

麻將軍之官肅州

有引

將軍名胤揚雲中人也早讀軍書夙稱將種張
然明特起酒郡獨號邊人渾鐵勒世為蘭都不
愧乃父李都尉善射爰惟將軍之孫曹保臣多
謀固是國華之子策杖而歸河北雲臺之烈再
見仲華捧詔而入臨渭興元之功不數忠武威

名久著於梁宋愷澤聿遍乎覃懷維茲穰州逼
隣楚地躍馬嘶檀谿之月未授首者六年長鯨
薄漢水之城被流血者千里猥以群醜致簡師
貞昔黃巾暴起於潁川得義真而大定又梁龍
扇動於交趾藉朱雋以成功律既叶於丈人兵
無慚於仁者託宿廛市以無擾如武穆之過廬
陵令犯鎧笠者必誅似子明之在南郡時維季
夏人去西涼念長城起自臨洮衛中國須斷右
臂陳湯揚旌於赤谷郅支懸萬里之頭班超起
家於祭酒西域開五十之國古猶今也公其人
焉同人數輩離酒一尊念生平肺腑之交如公

絕少感疇昔膠漆之意乍別實難送南浦而消
魂不啻斷腸憐此日望陽關而灑淚可知聚首
是何年聊復贈言各成近體

王師六月即征途况是西涼天一隅耀日旌旗明弱水
凌秋鷹隼下休屠霜寒玉匣青芙見風老金微白麥枯
萬里陽關從此去邊陲無事但呼酥

佇看戎軒去絕邊涼州天末靖烽烟自來青海連西夏
此處黃河帶赫連唐室中興靈武後漢家上策竟寧前
將軍一石猶難醉故遣將軍到酒泉

對酒聊爲出塞歌送君百二度山河寶刀人醉葡萄劇
鐵騎秋肥苜蓿多疏勒城連群積出崆峒雁帶早霜過

玉關莫問班家事五姓單于已請和
得孝感然石書

牂牁江上羽書催裹血將軍夜半回
異國驚魂豺虎路
天涯洒淚弟兄杯難堪生死十年事
都傍關河一使來
壯志彫傷霜鬢短幾回殘夢楚天隈

寄周元亮

北風浙瀝雜征塵猶記衣冠南渡身
自許徐陵初使鄴
豈知庾信竟留秦十年夢對江東酒
萬里鴻歸海角人
蕪沒梁園賓客盡宋家陵寢大河濱

五日懷胡韜穎中丞李慶餘副使

綠楊遮處雨鳴鳩杯底葡萄映火榴
按部好尋龍臥處

屏騶肯向鹿門遊中丞露布開荆甸
宰相軍書盡粵州
半世壯心銷不盡憑君一上仲宣樓

晤孫高二生

廿年杵臼化飛烟曾記長干帶醉眠
愧乏雄名傳瀚海
空勞垂白見桑田高臺破壁晴翻燕
短樹斜陽晚抱蟬
莫謂孫登真大隱蘇門舊在嘯臺邊

文心酒况兩迷離亂後相逢老大時
博辯舊曾翻白馬
高懷今喜對黃鸝天台久著興公賦
蜀國爭傳節度詩
知已年來零落盡忽追往事憶南皮

三湘五嶺鼓鼙頻百戰空餘未死身
誰念伏波傷薏苡
枉教充國畫麒麟舊遊却憶山陽煖
官况惟存漉酒巾

暇日長林多布穀作書今欲報同人

寄懷申陽兵巡孔哲弟

以下常寧刻集

嶺外霜風擁馬蹄長松鬣鬣古今西不堪我北君南去
况是天寒日欲低山老無人孔雀睡驛荒對酒鷓鴣啼
豈知一別六年外聞說炎荒尚鼓鼙

百粵樓船擁帝符申陽使者舊蒼梧殘燈鬼哭幽篁雨
老馬人分絕嶠途江左華風還六代汝墳地氣舊南都
年來毛羽摧墮甚夢裏雲霄失壯圖

重經博望

舊封蕪沒只荒苔鳩面人家住草萊破塚黃狐成隊出
墮墮野彘侮人來直教鑿空

孔音星源見誰信浮查碧漢

開試問輪臺何日詔多因方士海東回

汝南觀音閣逢母誕辰

征塵白露淚沾裳五十今纔過汝陽豈謂將兒還北道
不堪垂老憶高堂秋來野寺聞蟲語月落空山叫鴈行
萬古并州歸逝水重憐落葉感他鄉

經汝南哭吳孳昌

有引

孳昌予同年友也固始人弱冠成進士總督雲
中罷官為軋已者所中竟以笞辱死無後汝寺
僧為予言僧師超然計其後事甚周予既多僧
誼乃哭之以詩並垂焉

汝陽城角對重軒古寺思君不可言官跡幾年同紫塞

郵書往日滯金門山陽死後琴聲絕絳縣來時獄吏尊
試看橫溪山上草只今劍戟豎英魂

朔州節鉞大中丞一旦風摧萬里鵬酷吏甘人何必賊
交情誓死獨畱僧秋原宿草難懸劍亂世無刑慘弔蠅
自愧同遊寃未雪傷心鈴閣最高層

過汝陽懷一韓貢士

廿載騎驢走大梁那堪轉眼是滄桑聖朝自棄雲中守
往事深慚許子將白露秋塘菡萏死荒城古瓦海棠芳
懷人野寺頻搔首嘹唳空宵雁幾行

八月十二夜商水寺

好月清樽喜勸酬兼逢客邸近中秋衣邊蟋蟀鳴蕭寺

戶外蒹葭帶戍樓客夢連宵紫蔡國征途明日入陳畱
兵戎到處勤飛輓况是宣房未報休

高柴里

高柴里望大康城風雨迷離秋草橫斷塚荒岡沉舊鬼
饒鴟老樹吼新晴中原水患三河淚南國軍興百粵兵
老去何堪復躍馬關山迢遞不勝情

乙未仲秋北上紆道晤曠菴弟鄆城時弟亦罷官
何意長安復此行關山萬里帶秋聲初鴻纔出滹沱渡
老馬重臨光武城宦况都隨俠骨盡霜華忽使壯心驚
可知年事蹉跎去磨蝎同宮弟與兄

重陽前一日都下晤譙明

燕臺黃葉報新霜底事離愁未可量
宋室山河迷艮嶽漢家將相老南陽
豈知鴈阻連年札忽使花臨九日觴
尚憶滄桑分手地清源皎月照河梁

都門晤桑笈雲侍御時予久放公亦再謫

晨星遮莫感同遊客卽重逢
十二秋馬首新霜臨易水
燈前殘夢是并州憑教白苧翻歌板
共拉青衫踏酒樓
昨日東門瓜已熟問誰更覓故秦侯

董福兄燕邸夜話

薊門秋老斷征鴻把臂高粱問故宮
避世敢云稱水鏡掄才真不愧山公
十年旅鬢迎霜白一夜衰顏對酒紅
更欲重遊郭外寺碧雲黃葉夕陽中

長安晤張譙明趙錦帆夜話有作

相逢莫厭酒杯頻共醉銅駝陌上塵
亂後猶存天寶客詩名况是建安人
秦珠海貝新豐市舞袖香車別院春
往日園陵松柏盡可堪回首一沾巾

燕邸晤大司農戴巖犖

才名海內舊龍從咫尺星辰玉燭紅
富國羞稱鹽鐵論封侯舊讓轉輸功
金堤河畔方橫潰玉斧圖邊劇戰攻
水旱東南民力竭莫教上苑起新豐

燕邸東元亮侍郎

有引

同里年友周元亮官閩方伯遷副憲尋晉少司
農爲異已者所伐天子下議聞撫公杜門引大

臣謝過不妄交賓客予投劾日久挾兒輩赴武
闈把臂逆旅歌且泣因念庚辰同遊今閱十六
年生死聚散真同晨星元亮方貴顯旋爲人所
下石將伯何人谷風永歎嗟乎此昌黎所以痛
惜於柳州也予拓落連年迤邐草間尚復言天
下事耶身同張儉形類賈彪元亮視予於朋儕
中何如也撥燈蕭寺書此以報元亮昔人云虎
不食小兒與醉人畏其定也吾於元亮亦然
征蹄又復踏燕霜京洛風華蹴踘場取笑久看來鄧禹
竝生那更遇周郎禁城名酒芙蓉劍古寺寒燈薜荔裳
莫向薊門西北望香山石馬正淒涼

越嶠樓船震百蠻東南帝璽手親頒八年天向愁中老
萬里人從海外還自許新恩酬息壤豈知往事類中山
漢家高爵誰能擅定遠書生久在關
馬上離愁對帝都相看零涕感東隅上林烏柏霜初染
太液紅渠露早枯苦戰未酌光祿塞作官空羨執金吾
朔風浙瀝鳴哀柝還似甌山聽鷓鴣
霜華對酒夜婆娑同病相憐且放歌猿臂封侯邊將少
蛾眉生妒漢宮多毀深即墨偏宜賞客是任安舊許過
攜榼金魚亭子上濠梁意興問如何

燕邸晤張譙明給諫話舊

有引

甲申二月闖賊自潼關渡河予先是丁母艱住

澤州聞信連宵走輝行萬山虎穴中抵輝晤譙
明旅舍遂促裝攜家同予避地南下晨炊夜蓐
與俱綠林竊起狙人周道譙明多算所在輒行
隙地得以無虞譙明與某將軍善寓清源予因
同王尚書覺斯渡江此後江左草創時事沸羹
今上之二年丙戌予官楚以不合達官意歸聞
譙明令武林久不調南北雲樹蒼茫萬里予卧
疴山中貴交云稀復不審譙明今作何官會乙
未秋杪薄遊舊京杯酒闌珊把臂零涕屈指前
遊則已十四年矣

太行鐵馬震清淇攜手東征與子期林慮桃花方綻蕊

河干楊柳正飛絲衣冠南渡真殘夢鼙鼓中原自一時
痛定那堪思往事白頭相對不勝悲

春草歲蕤送馬蹄陸離長劍手親提帶星夜走青州路
鳴鏑時聞濟水西十載離愁羸氏鹿一時倉猝祖生雞
荒城猶憶淮揚月我去吳門君住齊

壽王七襄太夫人

寒梅冰骨老霜天雪蕊繽紛照綺筵截髭又經華髮日
斑瀾况是繡衣年蓬門風雨連秋杵總帳蕭條對斷篇
歲歲東風吹燕子幾看海水化桑田

孤檠午夜鎖深帷四十年中萱艸悲江左勲名陶侃母
東京節義范滂兒香清畫省開靈鷲月滿岩城叫子規

我亦藐孤慚畫荻白華有恨淚空垂

送楊猶龍太史之河東觀察

別酒同君不欲停漫因出使感飄零歸來才子金蓮燭
謫去仙人太白星汾柳先春迎旆綠行山萬古插天青
應知門下傳經客不少侯芭過草亭

送藉茅太史之浙中觀察

瘦日高梁蕩酒旗客中送客更堪悲朔颺落木征輶晚
斷壘寒花驛路垂暫借圖書充岳牧不妨節鉞是台司
臨安千古興亡地借問湖光知未知

王似鶴按察之中州

弓鳴落日帝城邊節鎮旌旗出使年雪苑寒雲梁殿闕

朱仙父老宋山川十年水旱褰帷裏八郡瘡痍畫戟前
聞說宣房煩壁馬好從河伯問桑田

燕晤錦帆投詩見慰率此奉答

孤館淒清旅夢勞冬深况復朔風高西京以後無班史
南國何人續楚騷酒底叵羅新貯月匣中歐冶欲吹毛
昭王死後憐才少日暮金臺哭斷蒿

招提佛火共寒宵病骨鄉思倍寂寥海甲兵全駐楚
天家將相半生遼平沙古北烟沉塞積葉蘆溝雪滿橋
萬國車書猶此日不妨聖世老漁樵

桑笈雲分藩南汝

埋輪尚自憶張綱君向巡按關中使者車麟塞艸霜此去還應如

左輔誰云不可問南陽褒斜山勢連秦楚唐鄧風聲走
宋梁莫謂春陵王氣盡雲臺將相舊家鄉

燕城送客夕陽邊為賦南都第一篇四翼蛇空鳴舊地
雙飛雉已去何年東京王業昆陽壘北魏兵鋒懸瓠田
最是中原要害地使君立馬莫潸然

燕京晤王鵬起訊太原舊遊

廿年旅夢太行山保障虛慚尹鐸還一自碑傾狄相字
至今沙漫土橋關予往尹曲陽有建狄梁公祠及三堡碑猶存隋宮鬼哭唐兵淚趙
地燐吹漢草斑遮莫鐘聲思往事晉祠明月水潺潺

陳公朗山東方伯

旬宣特命舊詞臣行省中書任秉鈞乍借蘭臺司鎖鑰

故教文苑貌麒麟寒帷應過燔柴地立馬猶思煮海人
此日山東還宰相莫將開閣侈平津

薛彤澣分守蒲州

寒日高牙出帝城離迷霜草暮烟橫雲邊山壓中條色
天外河流砥柱聲亂後沙塲餘斷戟關前野老拜雙旌
漢家原是股肱郡咫尺咸陽接舊京

再送公朗之山東

待漏金華曉箭鳴東藩鹵簿出神京侯門履跋三千客
國士談傾七十城朋舊偶隨黃葉散離愁忽傍酒杯生
遼陽故地扶桑外聖世高麗不用征

乙未十一月戴尚書奉命畫山水十二幅又賜

御墨三幅

金鑰纔開下玉綸初陽墨氣動鴻鈞帝教冊府傳能事
天啓圖書是近臣萬里山川皆入覲百年艸木更生春
丹青好借調元手莫畫雲臺第二人
宸翰淋漓寶氣浮多材先即老臣謀墨卿風雨三千个
毛穎山川十二州虎拜敢云稱絕技龍章固已代封侯
四方水旱圖難盡爲付安門監者收

雪邸撥悶

乙未臘月初一
是月十三初度客燕

天邊雨雪夢中身病骨支離馬上塵萬里鄉關催落葉
百年齒髮見勞薪清時忍著潛夫論畏路空餘妒女津
禁雀不飛宮樹靜瓊花曉散上林春

王念六之官翰林

名廷諫先爲侍中

離亭落日下桑乾積雪香山一帶寒天使遠開張掖郡
侍中舊著惠文冠千峰紫塞雲間出萬里黃河天外看
君去試詢元昊壘可知將畧范兼韓

仲冬燕邸贈嚴生港

寒城把酒醉琵琶何處鐘聲響暮鴉投杼似聞市上虎
藏弓爲有影中蛇日南蕙苾伏波柱西域葡萄博望槎
自笑功成身不受高官且讓五侯家

曹秋岳侍郎之官廣東方伯

帝城斜日對尊罍萬里征車百粵開天上樓船懸嶺外
日邊寶玉帶潮來威名久著青驄使詞賦爭傳銅雀臺

近日炎荒無瘴癘羅浮早寄一枝梅

雲臺仗下出鳴騶元老旌旗海國秋銅柱自應傳漢使
呂嘉未許問交州陰崖雨氣枕榔濕晴日藤花翡翠稠
此去長沙猶繫馬思君一上岳陽樓

別篁菴學士

名憲汶曾見諱
補今官江右人

燕子磯頭醉白蘋五年別恨阻風塵天涯更對高梁月
歲暮還傷旅次神蕙苾囊中招謗客琵琶洲上再來人
那堪分手長沙去又負梅花上苑春

別曹子顧翰林

薊苑霜華送酒頻陽關一疊已沾巾帝城高會殘年盡
南國軍書白髮新馬蹴蕭王臺上月烏啼黑闥壘邊塵

中山南去漳河路想見楊林作賦人

飲中牟李贊恒署同憚涵萬殷伯嚴時予方南遊
兼用畱別

蘭膏漱灑奏金徽二月春城白雪飛海內知交雙短鬢
天涯車馬一征衣袁曹古戍迷官渡梁宋寒雲接帝畿
聞說長沙兵未解滄江久負釣魚磯

過博望

張騫故國宛城東異代人傳絕域功一自封侯來博望
更誰仗劍過崆峒殘碑廢井烽烟後衰草枯楊落照中
人世難逢惟漢武空教歲月老霜蓬

何處中郎出塞車荒涼極目嘯封狐尚方符節尋源使

西極山河採玉圖白水寒烟迷舊國方城暮靄接東湖
春來首藉離離盛曾飽龍媒上苑無

渡河

直從西極倒真源吐納洪荒日月昏萬里春冰瀾瓠子
千山雪浪捲龍門帆檣漁火陳橋近艸樹鯨吞艮嶽尊
十載河渠歸故道泥沙盡識大君恩

捧土從難塞孟津中州天險更無倫呂梁自許勞神禹
德水終難王暴秦少府金空曹衛地長干鬼哭宋梁人
滔滔不管興亡事南北分爭幾戰塵

南征畱別漢哲憲章天章諸子

二月重楊綠未齊南遊有客賦征輦孤帆春入君山暮

萬甲霜明嶽麓低親舊相逢憐社燕羽書未靖問荒雞
敢云新息頭空白躍馬還能定五谿

自襄陽開舟沔水大漲

樓船又向楚江開欸乃鏡歌定幾回萬里枯槎南鄭下
兼天雪浪武當來習池落日山公酒郢上雄風宋玉才
何似龍驤飄木柿石頭蘆荻鎖烟煤

漢口遇呂全五袁籜菴俱以飛語免官

仕路全如虎臂灘千回萬折共蹒跚不應再見中山篋
何事常摧九畹蘭行坂遭迂常北轍江城風雨自南冠
十年卻笑潯陽客往日青衫淚未乾

長沙送趙君鄰丁內艱還金陵

晴江把酒問湘靈欲疊陽關不忍聽溫嶠南來心獨苦
聶鄉西去劍猶腥城邊戰壘齊梁色雨後晴山虎豹形
四海為家還此日莫將舊淚洒新亭

長沙晤鸞傭劉孝廉話舊

戊子予以黔兵守潭凡十六晝夜

扁舟此日又江潭短髮蕭疎不耐簪戰壘常年思病骨
征衫依舊笑晴嵐繇來楚爵原稱子不謂雄風竟屬南
拉手衡陽頂上去紅霞夜看海天函

秋客長沙值大師西征

丙申

居然重鎮古潭州玉節金符照畫樓自許平章還節度
可知宰相舊封侯詔書不棄珠崖郡廟算還憐悉怛謀
聞說征南新介馬旌旗應已過壺頭

秋客長沙觸事有作

書生柱自愧雕蟲躍馬揮戈感慨中鄢郢只今傳白起
牂牁誰復繼唐蒙霜林乍墮深秋葉旅店初驚昨夜鴻
况是辰陽多戰鼓隔江烽火照湘東

長沙感懷

居然時序故鄉同斷戍殘烟感慨中苗壘洞庭還左右
霸圖湘水自西東鷓鴣雨泣宗臣廟鼃鼃雷喧帝子宮
十二年中爭躍馬向來割據為誰雄

轉因雞肋滯江津十載雕戈老戰塵時貴偏多馮主簿
世途爭似尹夫人豐碑廢邸彫黃蘗漁火空汀亂白蘋
酹酒還澆陶太尉霜風旅鬢一傷神

長沙即事和汪徵五

清湍只合理漁竿回首鄉關夢未闌自笑殘年霜鬢短
重來舊地主恩寬湘山淚盡惟存竹楚澤焚多不種蘭
却掃空慚丞相府猶分退食到盤餐

客潭感懷

江花江草互芊綿老樹離宮古廟前斷續漁歌湘水曲
有無山色祝融巔張王江上圍棋日楊億城頭飲博年
大渡河邊堪飲馬藤橋鐵鎖一鳴鞭

新綸紀事

龍髯一去不能攀血染乾坤草木殷天使聖人生渤海
手提長劍刈神姦輿圖再辨九州土華夏重呼萬歲山

更有新綸昭日月千年雲氣護燕關

十七年中宵旰身西陵寢樹北邙塵誰憐麥飯明宗墓
舊是長安天子人洛下朱榮禍獨慘雲中白馬勇無倫
神州無恙豐碑在愁見桑乾柳色新

長沙寄馬都督邵武並訊周元亮消息

許昌把袂意如何轉瞬滄桑廿載過自古封侯須汗馬
幾人開國指黃河天臨海角珊瑚老秋入衡陽鴻鴈多
顧曲周郎偏自悞鍾山曾是舊烟蘿

乙未冬燕晤周元亮時予叅軍于楚元亮以人言
罷司農復就直于閩別三年矣潭州七月書此為

訊

燕臺雨雪共開罇倉卒逢君出國門朱勃書成心獨苦
馬遷廢後道彌尊江城壁壘軍前色海國樓船戰後魂
半世飄零今老大不堪同病向人論

十載湖南歲月虛良朋消息久成疎可知名士親鈞黨
偏是功臣惹謗書海湧鰲身吞日本山連蜃氣鎖扶餘
莫言瘴癘人空老長信還能貯媿好

長沙軍中送雪肝侍御歸省河東八月十九日

故鄉曾記是并州送子旋歸憶舊遊子舊令陽曲廿載滄桑成

幻夢一番車馬付東流中條露早丹楓醉上黨風高白

鴈秋君去河東詢季布多方為我致曹丘

贈吉太丘秦人以縣令立戰功

宿裏郎官天下聞花封突起上將軍弓彎猿臂一輪月
衣帶龍樓五色雲誰信墨符堪破敵幾人銅柱自題勳
卻憐憔悴湘潭日聊復伸眉一對君

鷄公石

孤峰斗絕起沙湍曲徑危梯得畫闌萬壑松濤連郭沸
一灣黃葉帶江寒偶因風物思前部何事棲遲戀舊官
滿眼瘡痍堪涕淚幾回搔首問漁竿子十年內兩為永衡監司

永興觀音岸

半是人謀半鬼工層梯曲檻各玲瓏樵崖欲俯蒼鷹下
漁火時連古洞紅別有山河成大地居然樓閣在空中
忽聞南鴈催歸棹誰謂衡陽果斷鴻

蘓仙祠

群峰崑刻俯荒城洞壑雲從太古生掌上芙蓉初掩映
鏡中翡翠乍分明輕身欲挾飛仙去絕壁初聞落葉聲
廿載南遊今老大鹿門回首故園情

忽聞

策馬焚香別祝融松聲山色舊時同十年再作朱陵長
萬里今成白首翁薄命無緣朝北闕孤舟恰喜遇南風
此身便是投籠鳥回首衡陽笑斷鴻
湘東舊事幾回思忍向峰頭賦別離鸚鵡偶然巢北濟
鷓鴣原不戀南枝人同橄欖思回味樹似黃楊厄閨期
解綬歸來猶恨晚六門堤上酒盈卮

生來肉相不宜官到處逢迎折節難誰向王門憐寶瑟
曾無帝子惡儒冠煇將孔翠知何用毀後姬姜不耐看
却憶雲臺銷蝕盡南陽猶有子陵灘

重至寶慶有感先是以戊子提師入黔駐兵兩閱
月歸臥十季復起分臬朱陵以己亥陪直指重來
距十二年矣時又得滇南之信

雙清閣上醉飛觴記得驅車入夜郎異國人誰憐白首
此身何事獨南荒往來爭似衡陽鴈剪伐空慚召伯棠
又作昆明江上客好裁別賦寄瀟湘

邵陵北郭木蘭舟夾岸松濤帶畫樓鴻爪十年如幻夢
蓬根萬里此重遊湖山無恙畱孤塔溪崗依然鎖上游

昔日巖邊今腹裏按圖早已過梁州

別王振寰總戎

蕉園綠瀋午陰斜竹影參差暮雨遮
毳幕常懸瀚海月寶刀舊帶玉門沙
信陵座上偏多客去病生來不爲家
更憶湘東花藥寺秋深黃葉醉琵琶

送王南伯之浙閩

祖帳邵陵東郭隈戈船遠向大江開
白門雨氣三山壯赤岸潮聲萬里來
乍見錢鏐歸率土可知劉裕是雄才
洗兵還過嚴州渡莫上狂奴舊釣臺

哭王鐵山相公

救時宰相自前聞拯濟橫流獨有君
陌上銅駝摧九廟

關門鏡鷁搗三軍張良仕漢韓彭外
王猛治秦南北分
慘淡高郵湖上月夜來石馬照孤墳

開府當年駐二東臨淮壁壘更誰同
餘威鹿塞荒寒外
舊事龍髯涕淚中葛相才高嗟小就
馬援謗後竟無功
精靈此日東南歇好聽君王唱大風

武陵送洪三先生歸里因憶及亨翁相國

潭州把袂意如何風雨江城一棹過
東閣春深花信早
南荒戰久陣雲多周勳擬賜青州履
漢誓重新白馬河
但願難兄歸去早紫荆同醉舊烟蘿

衡州已亥五月趙興寧柱史陟岳竣西巡沅靖

楚山依舊夏雲奇天使來遊草木知
正值虞書巡岳日

况兼蜀相渡瀘時荒臺榭葉藏山鬼戍壘花苗喚子規
往日包茅還入貢莫教漢上問諸姬

潭州重九前二日留祖仁淵飲

晚秋風物自蕭蕭異國逢君破寂寥塞土封狼曾過海
軍中白馬舊征遼昆明鐵甲風帆下建業金戈露布遙
畱滯長沙空白首壯心未可對嫖姚

送張將軍送閩

戈船直下九江流海國旌旗望裏收十月湖南橘柚老
千山甌越荔枝秋興朝戰伐還熊耳絕域功名是虎頭
眼底蕭曹君莫問漢家獨有一畱侯

讀史亭詩集卷十二

終

